

ASO GAFUA, 27 IUNI 2016

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: Ou te faasilasila atu ua toe amatalia Taulumaga a le Fono Aoaofa Fautulafono.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofa Fautulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016.

TUUIINA ATU i lou nei Lima i lenei aso 24 Iuni 2016.

(Sainia): Tui Atua Tupua Tamasese Efi
O LE AO O LE MALO.”

FOFOGA FETALAI: Ua ou manatu tatou te tau fai molimauina le agalelei o le Atua i lenei taeao, ua mafai ona tatou toe potopoto ma Taitai o le atunuu, tatou te faatino lo tatou valaauina, ae a se manuia o Samoa ma lana tapuaiga.

O le mea la lea e tatou te faamoemoe i le Atua ina ia faapena ona tatou fonotatala ma le Atua, ina ia manuia ai taulumaga o tatou galuega o lenei aso.

Ou te tapa lau Afioga i le Sui Palemia.

27 IUNI 2016

LAFO MO LE FAATAATIAESE O TULAFONO TUMAU

Afioga Hon FIAME NAOMI MATAAFA (Sui Palemia): Ou te faatalofa atu i lenei taeao i lau Afioga i le Fofoga Fetalai ma le mamalu o le Palemene.

O le agaga o le lafo o le a faatulai atu ina ia mafai ona faaauau le tatou galuega, aemaise o le pitolaau a le tatou Komiti. Ma e pei ona silafia i le faatulagaina o le tatou Pepa o Galuega, o tatou Tulafono e lima ia o lo o i ai le faitauina muamua, o le faagasologa o tatou Tulafono Tumau, e faapea ona i ai aso e va ai le faitauga muamua ma le faitauga faalua.

A o le agaga o le lafo e pei ona ou saunia e faatulai atu, ina ia mafai ona faataatiaese a tatou Tulafono Tumau e mafai ai ona faitau faalua ma faapea ai ona faasolo a tatou Tulafono i tulaga e masani ai. Ma o lea lau Afioga i le Fofoga Fetalai ou te faatu le lafo, *Ina ia faataatiaese Tulafono Tumau 101(1), e avanoa ai le faitauina faalua o Tulafono Tau Faaofi e lima ia sa faitauina muamua mo le aso.*

Faaluaina e le Minisita mo Pisinisi, Alamanuia ma Leipa, Minisita mo Tupe Maua, ma le Minisita mo Faatoaga ma Faigafaiva.

Na faamaonia le lafo ma tulai ai Tulafono Tumau 101(1) ua faataatiaese.

FOFOGA FETALAI: Ou te tapa lau Afioga i le Sui Palemia.

LAFO A LE TAITAI O LE MAOTA

Afioga Hon FIAME NAOMI MATAAFA: Lau Afioga i le Fofoga Fetalai, e tusa ai ma le Tulafono Tumau 100(2), ou te faatu le lafo, *Ina ia tagofia e le Fono Aoao i le Tulaga Faanatinati Tulafono Tau Faaofi ua taua atu iinei, ona o ni mafuaaga taua tele:*

1. Tulafono Tau Faaofi o Teuteuga o le Tulafono o Tulaga o Tagatanuu 2016.
2. Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016.

Ma le faaaloalo.

Faaluaina e le Minisita mo Faatoaga ma Faigafaiva, Minisita mo le Soifua Maloloina, ma le Minisita mo Pisinisi, Alamanuia ma Leipa.

Na faamaonia le lafo.

27 IUNI 2016

**TULAFONO TAU FAAOFI O TAGATA E SUESUEINA MAFUAAGA
LILO O MALIU 2016 - faitauga muamua**

Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Tagata e Suesueina Mafuaaga Lilo o Maliu 2016 i lona faitauga muamua.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai, ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo le faitauga faalua i le aso fono lona 3 e mulimuli mai.

**TULAFONO TAU FAAOFI O TEUTEUGA O LE TULAFONO O
FONO A NUU 2016 - faitauga muamua**

Tofa Hon FAIMALOTOA KIKA IEMAIMA STOWERS (Minisita mo Tina ma Tamaitai, Atinae o Nuu, Afioga ma Agafesootai): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fono a Nuu 2016 i lona faitauga muamua.*

Faaluaina e le Minisita o Tupe, Minisita mo Tupe Maua, ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo le faitauga faalua i le aso fono lona 3 e mulimuli mai.

**TULAFONO TAU FAAOFI O TEUTEUGA O LE TULAFONO O
TULAGA O TAGATANUU 2016 - faitauga muamua**

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Ta Faaofi o Teuteuga o le Tulafono o Tulaga o Tagatanuu 2016 i lona faitauga muamua.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai, ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga muamua.

27 IUNI 2016

**TULAFONO TAU FAAOFI O LE KAMUPANI A LE LANDING 2016
- faitauga muamua**

Afioga Hon TIALAVEA LENIU FEA TIONISIO HUNT (Minisita mo Tupe Maua): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Kamupani a le Landing 2016 i lona faitauga muamua.*

Faaluaina e le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo le faitauga faalua i le aso fono lona 3 e mulimuli mai.

TULAFONO TAU FAAOFI O TEUTEUGA O LE TULAFONO O LE GAUMATIVA 2016 - faitauga muamua

Afioga Hon FAAOLESA KATOPAU T. AINUU: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Gaumativa 2016 i lona faitauga muamua.*

Faaluaina e le Minisita mo Fesootaiga, ma Faamatalaga o Fesootaiga Vavave Faaneionapo, ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo le faitauga faalua i le aso fono lona 3 e mulimuli mai.

**TULAFONO TAU FAAOFI O TEUTEUGA O LE TULAFONO O FUA FAATATAU O LAFOGA O OLOA E GAOSIA I LE ATUNUU 2016
- faitauga muamua**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai o te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 i lona faitauga muamua.*

Faaluaina e le Minisita mo Tupe, Minisita mo Faatoaga ma Faigafaiva, ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

27 IUNI 2016

**TULAFONO TAU FAAOFI O TEUTEUGA O LE TULAFONO O
TULAGA O TAGATANUU 2016 - faitauga faalua**

FOFOGA FETALAI: Talu ai ua maea ona faamaonia le lafo o le Tulaga Faanatinati o le Tulafono Tau Faaofi lenei, o lea o le a sagai atu loa le Fono Aoa mo le faitauga faalua.

Tulai mai lau Afioga i le Sui Palemia.

Afioga Hon FIAME NAOMI MATAAFA: Lau Afioga i le Fofoga Fetalai, a o le Tulafono lenei pei ona e saunoa o le Tulafono sa faaulu mai i lona Tulaga Faanatinati, ae peitai ua i ai se finagalo o le Afioga i le Palemia e ou le Tulafono, o le a toe faasee mai i lona tulaga masani o le faasologa o tatou Tulafono, ina ia faapea ona faasee atu i le Komiti pe a maea ia lona faitauga faalua. Ma o lea la lau Afioga i le Fofoga Fetalai, ou te faatuina ai le lafo, *Ina ia faitauina nei le Tulafono Tau Faaofi o Teuteuga o le Tulafono o Tulaga o Tagatanuu 2016 i lona faitauga faalua ma ou te fia tautala faamalamalama i ai.*

Faaluaina e le Minisita mo Tupe Maua, Minisita mo Faatoaga ma Faigafaiva, ma le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi o Teuteuga o le Tulafono o Tulaga o Tagatanuu 2016 i lona faitauga faalua.

FOFOGA FETALAI: Ou te tapa ma le faaaloalo lau Afioga i le Sui Palemia mo lau saunoaga faamalamalama.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai, ma le mamalu o le Palemene e pei lava ona silafia aua sa i ai le taeao o le vaiaso ua tea sa faapea ona faamalamalama ai foi i sui usufono mamalu o le Palemene ia tatou Tulafono nei ua amata ona faagasolo. O le Tulafono la lenei o Teuteuga o le Tulafono o Tagatanuu, e le o se suiga tele ma e o le auga lava o lenei Teuteuga, ina ia mafai ona tuu atu i tua i le augatupulaga lua po o se second generation, ia le faamauina mo i latou o e o lo o talosaga mai aemaise i latou o e o lo o alaala ma afifio i nuu mamao. O loo talosaga mai mo a latou sitiseni Samoa, ma e pei ona silafia e lau Afioga ma le mamalu o le Palemene le tatou Tulafono tuai sa i ai, e tuu i tua i le tupulaga muamua na o matou. O lona uiga, o le matua ma lana fanau lea e mafai ona talosaga i le tatou Tulafono o lo o ia i nei ae peitai, o lea ua tuu atu i tua i matua o matua grandparents. Lau Afioga i le Fofoga Fetalai, ia o le auga lena o le Tulafono ma o lona uiga ua faalautele le avanoa mo e o lo o talosaga mai mo lea faamoemoe ia ma le agaga foi ina ia faapea ona mafai ona tapue le tatou Malo e ala i ona tagatanuu ia tomai ma taleni eseese e mafai ona auala mai ia tatou tupulaga ia or second generation.

Ia lau Afioga i le Fofoga Fetalai o se faamatalaga puupuu lea e uiga i le tatou Teuteuga lea ma le faamoemoe ia o le a faapea ona mafai ona faagasolo tatou Tulafono i ona tulaga masani, ma le faaaloalo lava.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

FOFOGA FETALAI: Malo faafetai ua faamalamalama le saunoaga a le Afioga i le Sui Palemia e tusa ai o le Tulafono. Ma o le avanoa foi lenei e tuu atu i le mamalu o le Palemene e saunoa ai sui usufono e tusa ai o lenei Tulafono.

Ia tulai mai le sui usufono mo le itumalo o Salega Sasae, faamolemole.

Tofa OLO FITI AFOA VAAI (Salega Sasae): Ia faafetai i lau Afioga i le Fofoga Fetalai mo le avanoa, e piiama foi lenei itumalo i le taulaga faafetai pei ona e siitia i lenei taeao aua foi le alafai mai o lau Afioga i faguga lelei aemaise foi o sui usufono mamalu o le tatou Palemene. E le umi se lagona vaivai lau Afioga i le Fofoga Fetalai ona o lea ua manino ia tulaga uma ma auga ma le faamoemoe o le Teuteuga o le Tulafono Tau Faaofi lenei.

Na o le pau lava nai fesili e lua e fiamalamalama ai, o lea e manino mai nei le Tulafono na o le second generation, ae afai o se Tulafono ua faataoto mo le lumanai, o lona uiga i lau tilotilo i le Tulafono, e pei o lea e gata i le second generation, ae pe a faapefea le third generation ma luma atu. Ia ona taoto loa lea o le Tulafono e umi ona faaoga.

O le lona lua lau Afioga i le Fofoga Fetalai, o le Tulafono Tau Faaofi lenei o lea e famamafa mai ia le tulaga o tagatanuu Samoa. E te matauina foi lau Afioga i le Fofoga Fetalai, o lo o i ai le Tulafono lea o Tagatanuu lea ua i le Teufaafagaluegaina o Tupe. O lona uiga o le a agavaa so o se tagata o isi atunuu e avea ma tagatanuu Samoa, afai la e agavaa i le tulaga lena, o lona uiga foi o lea e agavaa mai i le Tulafono lea ma le Teuteuga o le Tulafono lea. Ae i ai lava lou manatu lau Afioga i le Fofoga Fetalai, e tatau ona faataoto atu i tafatafa o le Afioga i le Sui Palemia, o le tulaga lea pei ona fai ai le Tulafono lenei ma le faamoemoe lelei manaia. Ae i ai lava lou manatu e tatau ona 100% le toto Samoa po o se toto afakasi, aua o lea ua tatala le Tulafono i isi tagatanuu lea e mafai ona talosaga mai ma avea ma tagatanuu Samoa. Ae e ao lava ma tatau ona taofiofi, ona o lea ua ou vaai atu i le Tulafono Tau Faaofi, ua matua matala uma faitotoa mo isi tagatanuu lea o le a taumafai e talosaga mai i tulaga tau tupe e avea ai ma sitiseni Samoa. Pei o nai vaega ia lea e fia malamalama ai lou sui usufono lau Afioga i le Fofoga Fetalai, faafetai mo le avanoa.

FOFOGA FETALAI: Malo, se i tulai mai le sui usufono mo Aleipata itupa i Lalo.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga Fetalai, faafetai foi ua uma ona sii le viiga ma le faafetai i le Atua i lenei taeao, ia tatou latasi e pei o lea. E momoli atu foi le agaga faafetai i le Afioga i le Tamaitai Sui Palemia e tusa ia foi ma lenei Tulafono taua ma le aoga. Ou te tulai atu la ma le faaaloalo, e leai se agaga e faalavelaveina le Tulafono.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

Ae tasi lava lau mataupu, o lea foi e manino e toe ave le Tulafono pe a pasia nei le faitauga faalua ave i le tatou Komiti mo isi iloiloga. Ae pau lava lau fesili ma le faaaloalo lava i lau Afioga i le tamaitai sui Palemia, pe faamata lava e mafai ona suia le tupulaga lua i tua i le tupulaga tolu. O le mafuaaga po o le rational o lau talanoa atu lau Afioga o se faatusa o le tele ia o tagata totolua sa i Samoa o lea ua tele o latou alo ma fanau ua o i fafo. O le faatusa la afai o latou tama o tama Samoa o latou matua o great grandparents sa soifua i Samoa ae malaga atu i Ausetalia po o Niu Sila, o le tele o nei tagata e i ai o latou sootaga i Samoa ua tautaua e le gata i le aotauina i Iunivesite ia ae faapena foi i taaloga, faapena ma le tele o mea e tauleleia ai le atunuu aemaise lava taaloga. O lea e silasila ma le totoa i tatou au ia ua pau mai sa taumafai mo le Olimipeka o le Taitoafitu a tamaitai, ia faapea foi le taitoafitu a alii ia ae le gata i lea o isi taaloga e i ai le siisii uamea mamafa, pulu mamafa ia ma taaloga eseese uma lava e le i taitai oo i ai le malosi o tatou pei o le aau. Ia a o lea e maua nai alo ma fanau na fananau pe na soifua mai i matua o matua great grandparents, aua o le tele lava o tagata na malaga loa i atunuu i fafo ia na soifua ai lava ma fananau ai o latou alo. O le tupulaga la lea lona tolu, e ese le soifua mai o le mananaia ia ma e aoga foi mo le atunuu e le gata i le siitia ai o le tulaga tau taaloga ia ae iai foi o latou tomai faapitoa e mafai ona malaga mai ma latou. E pei o le faatusa lau Afioga o le Tulafono lea e loma nei o le Pathologist po o le tagata lea e taoto ai tagata maliliu. Ia o lea e manino mai lava i le faailo mai a le Afioga i le Minisita o lea Matagaluega le le toatele o nisi ua aotauina i le vaega lea.

Ae ou te talitonu lava ma le agaga mauualalo, e i ai ni a tatou faapea e i ai le tomai faapitoa e maua mai pe a tuu i tua le tatou Tulafono i great grandparents i lo le grandparent lea i ai nei ma le faaaloalo, ia manuia le Fono.

FOFOGA FETALAI: Malo faafetai, ia se i tulai mai le sui usufono o lo o fia saunoa.

Afioga PESETA VAIFOU TEVAGAENA (Faasaleleaga Nu.4): Faafetai i lau Afioga i le Fofoga Fetalai ou te tulai atu e faali le agaga fiafia ma le agaga faafetai i le taua o lenei Tulafono. Atonu foi o le Tulafono lenei o le tele lavaa o le vaega o lenei Tulafono ua uma ona talanoaina foi e le Palemene i le Paeaiga talu ai. Ae o le agaga faafetai i le Tulafono, ona e tele foi ia nisi foi o talosaga ua sola i le tele o taimi, aemaise lava ia talosaga a nai o tatou grandparents ia mai Amerika Samoa. O le tele lava o tatou e tupuga le tama i Samoa nei ae o le tina po o se Amerika Samoa. O le tulaga lea sa i ai ia e okomeki a ia alo foi ma fanau o ulugalii nei, po o le tama i inei po o le tina foi o le i inei ae o le tama o le Amerika Samoa. O lea la ua aumai le Tulafono lenei, o le taua ia aua o le mea sa i ai a taumafai atu se talosaga i le mea sa i ai e tatou te o a i le process masani foi lele, ma e i ai a le fee sa totogi i le taimi lena masalo po o le \$5,000. E tusa lava pe faapea o lou grandparents o Upolu nei a o oe o le Amerika Samoa e totogi lava lau vaegatupe lea.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

O le talosaga la i le ava ma le faaaloalo e fiamalamalama ai lou nei sui usufono, ona o lea la ua aumai nei le Tulafono o le taua lea o lea ua au i le generation lona lua ia le malosi o le Tulafono. O le faafesili i lau Afioga i le Sui Palemia pe a faapefea la pe a pasia nei le Tulafono, po o le sitiseni la lea o le a okomeki mo alo ma fanau totolua a o le Samoa lava e aunoa ma se toe tologiina o se vaegatupe e \$5,000.00? Ia o lau faafesili atu lea ma lou faaaloalo lava, faafetai i lau Afioga i le Fofoga Fetalai.

FOFOGA FETALAI: Ia afai ua leai se isi sui usufono e toe fia saunoa, ia tulai mai le sui usufono mai Falealupo malie le sui usufono o Faleata Sisifo, se i maea ona saunoa le sui usufono matua o lea itu.

Afioga Hon AEAU PENIAMINA LEAVASEETA (Falealupo): Lau Afioga i le Fofoga Fetalai faafetai tele mo le avanoa, faatalofa atu i le pau o le Maota i lenei taeao. O lenei Tulafono o le taua ia e ala ona taua leaga e aafia ai tagatanuu o le atunuu, o le taua lea. O lona uiga i le talitonuga o lenei sui usufono, so o se tulafono e i ai se avanoa e faaono oo atu ai ia le faatanaga o e mai fafo e avea ma tagatanuu e maua i i i ituaiga Tulafono ia. E i ai nisi o tagatanuu mai fafo e mafai ona entitle uma lava i vaega nei lea ua amata ona aumai. Ia aua o lea e le i oo i Komiti latou te toe iloiloaina, ae na ona faataatia atu i tafatafa pe a oo ina oo atu i le loloto o le mataupu le amanaia ina ia patino mo tagatanuu Samoa moni, Samoa i sisifo leaga e taua mo le lumanai, e faauma atu le manatu pe a oo i le taimi lena, faafetai.

FOFOGA FETALAI: Tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga mo le avanoa e lagolagoina foi le Tulafono pau le mea o ni tatou aiaiga talafeagai. I lau faitau muamua i le Tulafono, ou te le o mautinoa po o le a le malosiaga ia tatou e mafai ai ona deny, ona aveese se sitiseni a se tagata na soifua mai i se tagata Samoa. Pe grandparent pe great grandparent po o le a lava le tulaga na fanau mai ai, afai o sou descendant aua o lea fai mai le Tulafono Citizenship by Descent o lona uiga o le tagata e alai ona sitiseni ona na tupuga mai i se tagata Samoa. Pau la le mea lea ua i ai le eseese ona o lea ua faapea mai Samoan Citizen, o lona uiga la a faapea mai Samoa Citizen tusa a pe le o oe o se tagata Samoa ae ua maua sau sitiseni through i le vaega foi lea o le sau nofo iinei mo le tolu tausaga po o se tagata foi lea mai fafo e leai ni on roots i Samoa. E pei la o le pa puipui lena lea ua ou toe tilotilo ai nei i le Tulafono, e ao ona toe tilotilo faaeteete i ai ma fuafua i ai le tatou Malo ma tatou. A o le tagata lava ia na soifua mai i se tagatanuu Samoa po o le 1800 po o le 1700, i lou lava talitonuga e i ai lona aiatatau e avea ai ma tagata Samoa. Ae o si ona pona la o le tulaga lea ua i ai o lea ua iai tagata ua tatou faasitiseniina ae le o ni tagata Samoa maioi. E pei la o le vala laititi lea e tataua ona tilotilo i ai tatou aua ana faapea mai le Tulafono o le sitiseni o se tagata Samoa e lelei.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

A o lea ua fai mai sitiseni e mafua mai i se tagata Samoa ua sitiseni Samoa. A tatou avea loa le upu sitiseni i se Samoa ma so o se tagata, ia o lona uiga pe Samoa pe Saina pe Initia, o lea la ua i ai le aia o le tagata lea ia tagata e tutupu mai i totonu o Saina po o Initia, po o fea lava o le lalolagi e mafai ai ona apalai mai i le sitiseni lea a tatou. E pei la o sina vala laititi lea o lea ua ou toe tilotilo iai ina ia toe tagai lelei iai ia tatou nei e faia le tatou Malo i le agai i le lumanai, aua e faigofie ia tatou i le taimi lenei. O tatou tuua foi na tutupu mai ai i lona taimi, ia o tatou o tagata Samoa. A o lea la ua ave nei ma faataga le sitiseni i le tele o tagata e gasolo mai ia o le popolega la lona o tatou. O lea ou te sau nei ma faitau mai le tusi lea a le Island business lea na aumai, le tusi lea China in the Pacific. Ou te le o fai atu ou te tetee i le Malo o Saina but it's something o lea e talanoa mai ai ona aumai ai lea e latou faataitaiga i atunuu uma lava o le Pasefika i le tele o le illegal immigrants lea i ai nei. E pei o isi na mea e te tagai i ai mo tatou tagata i le aga i luma o le faaeteetega lona. A o au lava ia o se tagata na tupuga mai i se tagata Samoa po o le a lava le tausaga pe parent, grandparent pe great grandparents, i lou lava talitonuga, e leai se malosiaga ia tatou e aveese ai le aiatatau a lea tagata po o se tamafanau a Samoa i le fia sau e avea ma sitiseni a tatou. Ae o le aiaiga la lona e tatau tilotilo i ai ma pa puipui le tagata foi lea ua sitiseni i isi mafuaaga ese mai i le toto Samoa. O le isi mea a o tatou i ai i le vaega lea lau Afioga, o le mea lea i ai o le matuai tele o le tagata mai fafo lea i ai nei generally ua leva ona nonofo i Samoa, ua faigata nei ona toe o e sitiseni ona o le tau o le citizenship lea ua i ai. Pe le toe tagai i ai lau Afioga sei tilotilo lelei ma vaavaai, pei o lea e talafeagai i tagata ia e omai mai fafo ia e fia o mai fafo e sitiseni ma omai, ia o tagata ia o tatou Samoa ma oi lea ua nonofo iinei ma faiava iinei, o isi ua tai 5tausaga tai 10 tausaga o nonofo iinei, ua i ai lou sister-in-law lea ua matua leva ona nofo ae le alu e fai sana sitiseni, ae fai atu nei e alu i le palota ae fai mai e le mafai ua taugata ou te alu atu e totogi le \$3,000 lea e fai ai sana sitiseni ona sau lea e fai sana palota, ona ou fai atu lea e leai la e le moomia e au lau palota. O lea ou te fai atu, aua o nai tagata nei ua nonofo ma aoga ma faigaluega iinei pe leai se fetuuaiiga o le tau o le sitiseni ina ia, ona ua fai tele sina taugata o le mea lea i ai.

Ae o le uiga o lau faamatalaga lau Afioga, e lelei le Tulafono, o le intension a ia o le Tulafono e lelei, mo tatou tagata ma tamafanau ua fia foi mai. A o nai pa puipui ia e tatau ona toe tagai i ai, ia le tatala, ona o lea ua faapoopo ai le Samoan le sitiseni i tua o le upu Samoa, ia e pei lava o le vaega lona e tatau ona toe tagai lelei i ai, ina ia fai fuafua i ai ia tatou faaiuga i le agai i luma ia e tusa ai o lea Tulafono ma le faaaloalo lava, faafetai.

FOFOGA FETALAI: Ia, malo masalo e toe pau lea o le sui usufono o lo o tulai mai e fia saunoa ona saunoa lea o le Afioga i le Sui Palemia. Ia tulai mai le sui usufono o Nofoga Tu Taulaga Sisisfo.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

Afioga FAUMUINA ASI PAULI WAYNE FONG (Itumalo Tu Taulaga Sisifo): Faafetai lava i lau Afioga o le Fono mo le avanoa, ia e ao foi ona taumafai atu se manatu vaivai e aua foi le Tulafono ua taatia nei i luma o le Fono Faitulafono. E tasi lava le manatu e tau fesoasoani atu i le tulaga lea i sitiseni nei, ona ua maitaulia foi i latou e sa taaalo ma galulue i isi atunuu tai pei foi o Niu Sila. Ia ona taaloalo lea i Niu Sila ua uma le malosi, ae manao e sau e alu e taaalo i le isi atunuu, ona afe mai lea i Samoa aua sona tagatanuu foi po o se Passport Samoa foi e alu atu ai i fafo. E tatau ona tatou autilotilo lelei i lea tulaga, ina ia tatou puipui foi, aua a manao e faaaoga le malosi, ona faaaoga lea i le isi atunuu, ae a manao e maua se tupe, ona oso mai laia i inei e avatu ai sona tagatanuu Samoa ia aua foi le ulufale atu i isi atunuu. Ae e lagolagoina foi le Tulafono ae e pau lena o nai itu e tilotilo i ai le mamalu foi o le Palemene aemaise foi Komiti o le a iloilo ina, ina ia taumafai na fai ni aiaiga faapea, a manao atu le Manu Samoa e o mai i inei, ona o mai lea e taaalo, ae le seiloga ua manao e maua le konekarate i isi atunuu, ia ona manaomia lea o le Passport Samoa faatoa oso mai lea i inei e issue atu ai. Ia o se manatu lea ma le faaaloalo lava, faafetai.

FOFOGA FETALAI: Ia malo faafetai, ia tapa ma le faaaloalo lau Afioga i le Sui Palemia mo le saunoaga.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai ia faapea foi ia sui usufono mamalu o e sa saunoa foi e tusa ai ma le tatou Tulafono Tau Faaofi ua toe teuteu. Ia ua maua atu le tulaga lea o le toe tatala atu i tua 3, 4, 5 ia augatupulaga. Ia atonu lau Afioga i le Fofoga Fetalai, pei o le isi itu taua lea i le toe suia o le faamoemoe o le faagasolo vave o le tatou Tulafono ma le faaiuga lea ua fai e toe tuu atu i le tatou Komiti, lea e mafai ona auiliili uma ai ia ituaiga finagalo ia ua faaalua. Ae ao pea ona fai atu se faamatalaga e tusa ai i le mea ua tuu ai i le tupulaga lua, aua o lea sa i le tupulaga muamua i matua. Ia ou te manatu o le fua lava lea, aua o le mamao atu o le tupu i tua, o le lautele foi lea o le tatala ma le toatele o le faitauaofai o tagata e mafai ona agavaa mo tagatanuu mo Samoa. Ma e pei foi o isi itu ia pei na laga mai e le sui usufono mulimuli lea sa saunoa mai, e lua a itu o se mea. O le tatala ina ia maua le avanoa, ae o le isi foi itu, e ao ona tatou vaai ma puipui, aua i le avatu o le tagatanuu, ia e i ai ona faamanuiaga, ona privileges ma tulaga faapena. Ma e i le vaaiga foi a faamalo ia, i le faapaleniina o le itu lea, o le tatala o le avanoa ia ma le puipui mai foi i nisi o ni mea e ono tutupu mai ona ua tatala ia se avanoa. Ma e o le fua lava ia ou te iloa o le fua faaeteete, its a caution amendment foi lea, o tatou o le atunuu laitiiti, lea ua tatou tuu atu i tua, i le augatupulaga e tasi, ia se i tatou mataitu foi ia po o le a ia ona taunuuga e ono aliae mai. Ia ona tuufaafegagai foi lea o lea mataupu i le tatala atu i tua, ia ma se tasi foi o saunoaga ia na tuuina mai e faapea, po o i ai i ai tatou se malosi po o se authority e tatou te tavavaeina ai le aiataa a so o se tagata na soifua mai, po o fea le mamao i tua o tupulaga na soifua mai i se tagata Samoa.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

Ma e i lau Afioga i le Fofoga Fetalai ma le mamalu o le Palemene, ou te manatu, aua o upu ia sa faaaogaina, o le citizen ma le descent, ma e tataua lava ona tatou tuu faamavaevae ia tulaga ia. O le tulaga faasitiseni, o le tulaga faaletulafono. O le descent, e leai lava se malosi e mafai ona tatou tavavaeeseina ai se tagata. Ae i ai le malosi i se Faigamalo so o se Faigamalo, e faapea ai ma faatulagaina i lea taimi ma lea taimi, o a ituaiga tagata e agavaa e avea ma tagatanuu faaletulafono. Ma e ou te manatu e fai ma faataitaiga, i le tatou Faamasinoga o Fanua ma Suafa, e le taumate o tatou uma lava ua tatou oo i ai i lea tulaga. E i ai e o lo o autovaa mai fafo, ou te iloa ua i tua atu, tolu, fa, lima o augatupulaga, ae o lea lava e autovaa mai i o latou aiataua ma e ou te talitonu o i ina e pine ai le descent, le tupuaga o le tagata. Ae i le Tulafono lava ia e pei ona faatulaga atu i le tatou Tulafono leni, e i ai lava ona aiaiga faaletulafono.

Ona ou oo mai ai lea i le mataupu lea sa saunoa foi i ai le isi sui usufono, i le tuufaafegai ai, o le Tulafono leni ma le isi foi Tulafono na tatou pasia mo o le a invest i le Investment Citizenship Bill e le faapea e aloaia lona faaaogaina....

FOFOGA FETALAI: Ua maua atu lou finagalo, se i tulai mai, ia leaga o lea ua finagalo malie le Sui Palemia ae tapa lau faaulavea.

Se i tulai ma le sui usufono mo Faleata Sisifo

Tofa Lealailepule Rimoni Aiafi: Faafetai i le faamalamalama a le Afioga i le Sui Palemia, ma ua manino lelei le saunoaga, ia e moni a au, ona pau lava le mea lau Afioga ona o le vaega o le Tulafono lea faapea mai o le citizenship by descent, o le sitiseni mai ou tupuaga. I lou lava talitonuga lau Afioga, o le suiga lea e i ai, e fetai lava mo i tatou nei e i ai le toto Samoa, ae o le popolega la lea e i ai, o le citizenship through citizenship. E maua lau sitiseni ona o le sitiseni o sou tagata tusa lava pe Samoa pe le Samoa e mafua ai i nisi tulaga, pei la o le vaega lea lau Afioga e avatu ai se fautuaga, e toe tagai lelei i ai le tatou komiti lea po o ai o le a faatalanoaina. E pei ua tuatalaloa tele, ua tuatalaloa tele le vaega lea, ae o le tagata ia na sitiseni mai e pei ona saunoa lau Afioga ma faamalamalama foi i mea ia e tusa ai o le tatou Tulafono i lou talitonuga o se tulaga talafeagai lea. Ae pau lea o le vaega ona o lea e faaulutala mai le suiga o le vaega tonu o le Tulafono citizenship by descent, i lou la talitonuga, e tataua ona tuatalaloa le mea lea aua o le descent, e pei ona sa tataua ona faapea mai citizenship, sitiseni ona o le avea ma Samoa citizen ona toe i ai lea o le suiga o le Tulafono. Ia ma le faaaloalo lava faafetai.

FOFOGA FETALAI: Malo, ua maua atu le saunoaga, se i toe tulai mai le Afioga i le Sui Palemia.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai, ia e pei lava ona masani ai foi, silafia foi e le Afioga i le sui mamalu na saunoa nei, tatou te o lava i le Tulafono o lo o i luma o i tatou. Ma o le Tulafono o lo o i luma o i tatou, e faatatau lea ia i latou o lo o alaala i fafo, o tupulaga lua o lo o fia avea i latou ma sitiseni. Ma e i lau Afioga i le Fofoga Fetalai, i tei ua tala atu i tua sau faamatalaga i isi ituaiga sitiseni, ia ona lavelave ai lea o le tatou mataupu. Ae tau ia ona faapea atu ma le agaga faaaloalo, o le taua lea o Tulafono, e faatupu manatu i ai tatou. E pei foi o le itu lea na tuu mai o le itu lea sa laga mai o le tuufaafegai, o le Tulafono lenei ma le Tulafono lea ua uma ona pasia, e tuuina atu sitiseni i tagata o lo o aumaia a latou tupe e faafaigaluega mo le tatou atunuu. Ia o lau Afioga i le Fofoga Fetalai, o lea lava tatou te manino, e faapitoa lava ia lena Tulafono, ma e i ai foi ona aiaiga, i lalo o Tupe Faafaigaluega ia e pei o se incentive, o la e malamalama lelei foi i ai ia le tatou Maota nei, e le o na o Samoa foi ua faia lea ituaiga faiga, ae o isi foi atunuu o lo o faapea foi ia ae tatou te le mailoa.

Ua fai le tatou Tulafono, ae faatoa tatou iloa lava le taunuuga o lena faamoemoe pe a faapea e toatele nisi e omai e aumai a latou tupe e faafaigaluega ai, ma faapea ona faatalosagaina ai ia le faamanuiaga lea, o le maua o le latou tagatanuu. Ae pei e tutusa foi la le mataupu lea lau Afioga i le Fofoga Fetalai, ia ma le mataupu lea o le sitiseni i isi ituaiga auala e mafai ona faatino ai. Ma e atonu.....

FOFOGA FETALAI: Se i tulai mai le sui usufono mo Salega malie lau Afioga i le Sui Palemia.

Tofa Olo Fiti Afoa Vaai: Ou te faafetai atu, faafetai i le Afioga i le Sui Palemia mo le tulaga lea ua faamalamalama mai, ia e moni e i ai aiaiga o le Tulafono lea i le Teu Faafaigaluegaina o Tupe a tagata ia o le avea ma sitideni. O le upu lea e faamamafa mai i le Tulafono o le Tagatanuu, e pei ona taua e isi sui usufono, aua e pasia loa ma avea ia tagata faipisinisi ma tagatanuu o Samoa ona faapea lea ona avea ma agavaa.

Afioga Hon Fiamé Naomi Mataafa: Lau Afioga i le Fofoga Fetalai, o le mea e fia faasao, e ese le Tulafono lea e saunoa mai i ai le sui usufono ua uma ona pasia e le Maota. E le aumaia la le Tulafono lena e faafinauina ai le Tulafono lea ua faataatia mo lona teuteuina, o le faagasologa o tatou Tulafono faamolemole.

Tofa Olo Fiti Afoa Vaai: Lau Afioga i le Fofoga Fetalai.....

FOFOGA FETALAI: Malie lau Afioga le sui usufono o lo o faauilavea o lea e saunoa, tuu atu pea le avanoa i le Afioga i le Sui Palemia. Ia lelei o lea ua faaaloalo atu le Afioga i le Sui Palemia i lou tulai mai.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

Tofa Olo Fiti Afoa Vaai: O le Tulafono Tau Faaofi leni, o le Tulafono lea lau Afioga i le Fofoga Fetalai ua matau tele lou popolega ona o le Tulafono e mafai ai ona avea nisi o le sitiseni Samoa. Afai la o le Tulafono lea o le Teu Faafaigaluegaina o Tupe e avea ai ma sitiseni Samoa, ona mafai lea ona agavaa i le Tulafono lea. O lou popolega lena lau Afioga i le Fofoga Fetalai, o le tulaga foi la lea o le tatala, lea e pei e popole i ai le Tulafono e pei o le tatala atu i tua i le second generation ana faapea na o tagata Samoa, o le a le mea e ala ai ona taofi, tatala, pe afai na o tagata Samoa moni.

Lau Afioga i le Fofoga Fetalai.....

FOFOGA FETALAI: Ua maua atu, ia manatua foi e tau fesoasoani atu, aua o le finagalo foi lea o le Malo, e pei ona faamalamalama ma saunoa i ai le Sui Palemia, o le ala lea e manatu ai le Malo e ave i le Komiti, ina ia faapena ona toe sasaa ai le fafao ia ua maua manatu i le Tulafono ina ia aoao manogi ai ia le paia i le Palemene aemaise o molimau o le a valaauina ai e le Komiti, e maua ai finagalo e matimati ai le Tulafono, e pei ona saunoa ai le Sui Palemia.

Se i tulai mai lau Afioga i le Minisita mo Faatoaga ma Faigafaiva.

Afioga Hon Laauli Polataivao Leuatea (Minisita mo Faatoaga ma Faigafaiva): O se mea e fia faamalamalama, ona o lea ua maua ua toalua sui usufono o lo o i ai le atugaluga i le mafuaaga lava lea e tasi. Na ona fesoasoani atu ina ia manino le mataupu o lo o saunoa malamalama i ai le Afioga i le Sui Palemia, e lua Tulafono maioio. O le Tulafono lea e saunoa i ai le Afioga i le Sui Palemia, o le Tulafono o le Citizenship Bill, ae o le Tulafono lea e i ai le atugaluga a sui usufono mamalu o lo o saunoa, e mafua mai i le Investment Bill. O Tulafono maioio la ia e lua e tofu lava le Tulafono ma ona malosia ma faiga faavae. Ma o lo o manino le saunoaga a le Afioga i le Sui Palemia, o le Citizenship Bill e tuatalaloa ona o i latou o tagatanuu o Samoa. O le Tulafono lea e saunoa ai lea aafia ai saunoga a sui usufono o le Investment Bill, e i ai foi ona tapu ma ona tapulaa, *neʻi teʻi* ua atugaluga tele sui usufono mamalu, ae o lo o manino lava ia boundaries o Tulafono e *leʻi* felavasai ia Tulafono ia e lua. O sau fesoasoani atu lea ua tuatalaloa le tatou mataupu.

FOFOGA FETALAI: Malo faafetai. Se i saunoa mai lau Afioga i le Sui Palemia.

Afioga Hon FIAME NAOMI MATAAFA: Lau Afioga i le Fofoga Fetalai, o le mea foi lea sa tulai atu ai i le mataupu e fia faasao, ona i le faasologa lava o tatou galuega, e faapena lava ona faataatia ua maea le Tulafono lea o lo o atugaluga i ai le sui usufono mamalu, ia ae ese mai i le tatou Tulafono lea o lo o faatalanoaina i le taimi nei.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

Ma e silafia foi e le Maota, e eseese auala e mafai ona maua ia tagatanuu, e pei foi ona i ai i le Tulafono lea e saunoa mai i ai le sui usufono, e i ai foi isi auala ia e pei ona faasolo mai i ai ia tagata e le o ni tagata Samoa, po o ni tagata Samoa foi ae ua mamao tele atu i tua ia o latou tupuaga, le vaega foi lea e manaomia ai le lima tausaga o i inei ma isi tulaga e agavaa, ia ma le tupe lea e tuu atu i ai. O le isi auala lena e maua ai a tatou tagatanuu e pei lava ona masani ai, ma ua leva ona faataatia ai a tatou Tulafono.

O le itu foi la lea o le taugata tele. Ia o le a ea le tau e tatou te tuua i le avea o le tagata aemaise o le tagata e le o i ai sona toto Samoa e avea ma tagatanuu. Atonu e mafai ona tatou faitau ua taugata i se isi itu, ae mafai foi ona tatou faitau, e matua taugofie lava pe a fua i le faaulufale mai o i latou nei e avea ma tagata o se atunuu matagofie e pei o Samoa lona saogalemu.

FOFOGA FETALAI: Malie le Sui Palemia, se i tulai mai le faauilavea a le sui usufono mo Falealupo.

Afioga Hon Aeau Peniamina Leavaiseeta: Lau Afioga i le Fofoga Fetalai, na o le fuaitau lava lea a le Afioga i le Tamaitai Minisita, pe o le mea o le atugalua lea a sui nei ma le mea lea o le sitiseni, aua lava ne'i avea se sitiseni i luga o ni tupe. O le sao lea? Maua lelei? Pei o le tulaga lena, fialia tele. A o se isi lava faiga, pei o le mea lena o lea e popole ai.

FOFOGA FETALAI: Se i tulai mai lau Afioga i le Sui Palemia.

Afioga Hon FIAME NAOMI MATAAFA: Lau Afioga i le Fofoga Fetalai, ou te le o malamalama tele foi i le faauilavea a le alii matua. O lea ua uma ona ou faamalamalamaina atu, o lea ua i ai le tatou Tulafono lea ua maea ona pasia mo le sitiseni mo e aumai a latou tupe e faafaigaluega, o le mea ua pasia ma e faapea ona faaalologia lona faaaogaina i le tausaga fou pe a tatou aulia ma le manuia.

Lau Afioga i le Fofoga Fetalai, atonu o nai tali ia e tuuina atu i nisi foi o mataupu sa lagaiina mai e tatou sui usufono mamalu, a o le mea taua, o lea ua toe suia le faasologa o tatou Tulafono, ma o le a faapea ona tea atu i le tatou Komiti, ia ona faagasolo lea i le tulaga masani ma toe foi mai i le lipotia mai o se faaiuga po o se fautuaga foi a le Komiti mo le Maota. ina ia aloaia le faiga o le suiga lea, lau Afioga i le Fofoga Fetalai ou te faatu le lafo, *Ina ia faasee atu le Tulafono Tau Faaofi o Teuteuga o le Tulafono o Tulaga o Tagatanuu 2016 i le Komiti o le Vaega Tau le Va Fealoai mo Iloiloga ma toe lipoti mai i le Fonotaga e sosoo ai.*

Faaluaia e le Minisita mo Faatoaga ma Faigafaiva, Minisita mo Pisinisi, Alamanuia ma Leipa ma le sui usufono mo Falealupo.

27 IUNI 2016

**Tulafono Tau Faaofi o Teuteuga o le Tulafono o Tulaga o Tagatanuu
2016 - faitauga faalua**

Na faamaonia le lafo. Na tuuina atu le Tulafono Tau Faaofi o Teuteuga o le Tulafono o Tulaga o Tagatanuu 2016 i le Komiti Vaega Tau Va Fealoai mo iloiloga ma toe lipoti mai ia Aokuso 2016.

**TULAFONO TAU FAAOFI O TEUTEUGA O LE TULAFONO O FUA
FAATATAU O LAFOGA O OLOA E GAOSIA I LE ATUNUU 2016
- faitauga faalua**

FOFOGA FETALAI: Talu ai ua maea ona faamaonia le lafo mo le Tulaga Faanatinati o le Tulafono Tau Faaofi lenei, o lea o le a sagai atu loa mo le faitauga faalua.

Tulai mai lau Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 i lona faitauga faalua ma ou te fia tautala faamalamalama i ai.*

Faaluaina e le Minisita mo Tupe, Minisita mo Fesootaiga, ma Faamatalaga o Fesootaiga Vavave Faaneionapo, ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 i lona faitauga faalua.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai mo le avanoa e faamalamalama ai le Tulafono Tau Faaofi lenei. O le Tulafono Tau Faaofi lenei o le toe fetuunaiga o Lafoga o le a ou amata mai i le suauu.

O le 28sene lea i le suauu ona o le tausaga lenei e le mafai ona tatou aveese ai le Excise Tax o le suauu lea tatou te tuua i luga o penisini o vaalele ona o le tausaga lenei e faagata ai, o le Tulafono la lea ua le toe avea i luga o le penisini lea e faatau atu i kamupani vaalele, a o lea ua tuu mai i luga o le tane lea e teu ai le penisini o vaalele ma suauu, ma o le fesuiaiga lena ina ia 'aau ai ne'i...ona o lea o le a le mafai ona tatou toe totogia ona tatou charge ina se excise i luga o le tau o le penisini vaalele. O le suiga la lena o le suauu, na o penisini vaalele lea e sui atu.

O lenei vaitau lau Afioga i le Fofoga Fetalai, e le o po se lilo i le tele o taumafaiga o polokalame a le Soifua Maloloina, aua le faamalamalamaina ma le galuega o lo o feagai ma i latou i nuu i tua i le taumafai lea ia maua e tagata uma o le atunuu le soifua maloloina lelei, aemaise lava i faamai le pipisi nei o lo o tele ai gasegase i uta i Motootua, pei o le suka, o le toto maualuga, aemaise foi o le faamamatoto.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

Aua o le polokalame lea o le faamamainao le toto e tele se seleni a le Malo foi e faaoga i ai, aua le puipuiga mai ma le taumafai lava e faafoia le faafitauli. O le Tulafono la lea e faapea o i ai se tupe a le Malo ona o tausaga uma lava e faamuamua e le Malo le soifua maloloina i lana poloketi i ana Buget lea e fai, o le Tala o le Tupe e faamuamua lava le soifua maloloina. O le agaga autu la o lenei Tulafono, ina ia mafai ai ona tau i ai se suiga, ina ia mafai foi e tagata o lo tatou atunuu ona taumafia e sui le taumafa i ni taumafa paleni aua le soifua maloloina, aua o le faamoemoega lena o le Tulafono lea, o le auala e tau atu ai foi i le atunuu le taumafai a le Malo i ni suiga, ina ia faataua le soifua maloloina o tagata lautele o le tatou atunuu. Aua e talitonu lava le faamoemoe o le Malo, o le tele lava o nei gasegase e maua mai, e maua mai i le suka. O lea ua i ai le Excise o le suka ma taumafa suamalie uma lava o lo o i ai, aemaise o le taumafa tapaa. O lea na maua mai i faamaumauga ua toatele le aofai o lo tatou atunuu e taumafa tapaa, ua sili atu ma le afa o le 50% o le atunuu o lo o aumai i faamaumauga o lo o taumafa i le tapaa. E tasi lea gasegase e matuia le kanesa lea e maua mai i le tapaa, pei o faamaumauga a le Ofisa o le Soifua Maloloina, aemaise o meaai o lo o maua ai le gao lololo.

O lea lava e taumafai e tau atu se feau i le atunuu, ina ia mafai ona tatou maua le soifua maloloina, aua a soifua maloloina lo tatou atunuu, e tele foi le tamaoiga e toe maua mai, e le gata i ekalesia a o nuu, aemaise foi o le Malo, e toe maua mai foi tupe a le Malo ina ia atinae pea le tatou Malo aemaise o le Tala Faatatau o le Tupe e faamuamua mai lava i tausaga uma po o le a le seleni utiuti o lo o maua e le atunuu ona e leai ni tatou minerale, a o lo o faamuamua lava le soifua maloloina o le Tala Faatatau o Tupe. O lena ua i le Tulafono ia taumafa ua siitia o saimini, o mea tau suka, o apainu mai fafo, o lena ua faapoo excise tax e 51sene i le lita. O meaai, o fagumalosi, e tele faalavelave e tutupu mai tua ona o le taugofie o le fagumalosi o lo o i ai. E moni lava o lena e sii, ae le o tele foi se sii, e oo foi i le tapaa, e moni lava o lena e sii, ae le o taitai lava ona tatou oo i le siitaga la e i ai atunuu i fafo, ae ona o le agaga lava ia faailoa atu i le mamalu o le atunuu ia faataua le soifua maloloina, pei o le galuega o lo o gapatia i ai le soifua maloloina. E pei o se faamalamalama lautele atu lena o le siitaga o le tatou Tulafono leni lau Afioga i le Fofoga Fetalai, faafetai.

FOFOGA FETALAI: Malo faafetai. O le avanoa foi leni mo saunoaga a sui usufono o le Maota, tulai mai lau Afioga i le sui usufono mo Salega i Sasae.

Tofa OLO FITI AFOA VAAI: Faafetai atu i le Afioga i le Minisita mo le folasaga malamalama i le tulaga o le Tulafono Tau Faaofi. O le vaega lea e pei ona taua i le suauu, malo, o le matua mataala o lau Afioga i le tulaga lea, e to atu lou pulou i lau Afioga.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

A o le isi vaega lea i meaai lau Afioga e faapea, o le a sii le tulaga o lafoga o meaai ia e i ai meataumafa e i ai le suka ma le masima, o le manaia ia o le aumaiga o le siitaga lea e faaoga mai le suka ma le masina. Ae silafia lelei e lau Afioga, toetiiti lava o le 99 o meataumafa a lo tatou atunuu, e i ai uma lava le suka ma le masima. O lona uiga sa tataua lava ona faapea mai, o le a sii uma ia taumafa o lo o tatou faaogaina, ona o lea e manino mai i le Tulafono, e leai se mea foi lea pe o le a le tele o le suka, pe o le a le tele o le masima, e tataua ai ona sii lea taumafa ma lea taumafa.

O le mea lona tolu lau Afioga, o i faatoa ou iloa ai e sao lelei lau fuafuaga lea e faamoemoe e tuu mai ai i lalo le gasegase o le suka ma le.....a, pe afai e sii mea ia. Aua o le tulaga lea e i ai, silasila foi i le Tala o le Tupe la na tea atu nei, ua matua alu i luga ia le tupe e avatu i le Dialysis le Faamamatoto. O lona uiga la lau Afioga i le Fofoga Fetalai, pei o lea e tau faaletonu a tatou tupe foi ia e fai ai a tatou preventions. Ae afai o le metotia lea a lau Afioga i le Minisita e sau ai i lalo, o le a matou mataitu i le Tala o le Tupe o le tausaga fou pe a toe alu i lalo se tupe ona o le aikia lea. Ae pau le mea e faamanino lelei mai lau Afioga i le Minisita, po o le a le tele o le suka ma le masima lea i meataumafa taitasi, ona o lea pei e general atoa le mea lea, o lona uiga a faapea e alu faapea, o lona uiga e sii uma lava meataumafa e faaogaina e le atunuu.

Ma le agaga faaaloalo lau Afioga i le Fofoga Fetalai.

FOFOGA FETALAI: E i ai se isi sui usufono e fia saunoa, a leai, o le a tuuina atu le avanoa i le....

Ia tulai mai le sui usufono mo Aleipata Itupa i Lalo.

Afioga TAFUA MALUELUE TAFUA: Faafetai lava i lau i le Fofoga Fetalai, e puupuu lava se manatu. E faamalulu atu foi i lau Afioga a le Minisita, e leai o lea e maua le avanoa i le taimi o Komiti, ae pei na o se mataupu puupuu lava lea tau ina faailoa atu, ou te tau pikia ai le agaga o le sui usufono ua tuanai atu, si au uo lea ia Levaopolo.

Lau Afioga i le Fofoga Fetalai.....

FOFOGA FETALAI: E fia faasaoina le saunoaga a le sui usufono, e le o toe ia Levaopolo le sui usufono mamalu, o lea ua sui lona suafa, o Olo Fiti Afoa Vaai o Salega Sasae.

Afioga TAFUA MALUELUE TAFUA: Ia e faamalulu atu i le Tofa Olo ma le uso mai Leone Tutuila, malo lava le soifua ma le lagi e mama.

Lau Afioga i le Fofoga Fetalai, ou te tulai atu ma le faaaloalo, pei e i ai lava sina popolega i le tulaga o le siitaga lea e i ai, ona pei o le vaega e sili lea ona mafatia ma aafia ai le atunuu lautele. O le aoga foi lena o le matou tutu atu ai i lenei itu o le Maota, matou te lagolagosua atu i lau Afioga i le Minisita ma faufautua atu ma tuualalo, ia na o le tuualalo o lea e avatu.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

Ae o lea ou te tilotilo i le ordinary bread po o le falaoa i le vaega e 120 lea foi e lavea i le 8% le sii, e faapena foi ma instant noodles, pei o nai mea lava nei o lea e ese le fiafia i ai o tamaiti aoga aemaise o le mamalu o le atunuu, o le vaega lea i Apia e aofia ai i le 70,000 o le aofaiga o tagata lea e i totonu o le catchment area a Apia ia e faapena foi ma nuu i tua e taumamafa lava i le falaoa ma le masina pei ona saunoa i ai le sui usufono ua mavae ia ma le suka. O tatou e pei o le soifuaga lava lea o tatou a maua lava le suka e faasuka ai le ti maua ma le falaoa, ia pei ua aulia foi le isi aso ma le faaaloalo. Ae pe mafai ona silasila i ai lau Afioga pei o basic items lava ia po o nai products nei e tauta tele mo le mamalu o le taumafataga a le atunuu e taua ona silasila totoa i ai, aua a sii ia e aafia le toatele o le atunuu ma le faaaloalo.

FOFOGA FETALAI: Malo, ia tulai mai le sui usufono o Vaisigano Nu. 1, o le a see atu i le sui usufono mo Anoamaa Sisifo pe a maea le saunoaga a le sui usufono mo Vaisigano Nu. 1, saunoa le sui usufono mamalu.

Tofa LOPAOO NATANIELU MUA (Vaisigano Nu. 1): Faafetai tele i lau Afioga i le Fofoga Fetalai mo le avanoa, faatalofa atu foi i le mamalu o le Maota i lenei taeao fou. Ia na o sina manatu puupuu e le tele na o si fautuaga mo le faamalalamalamaina po o le Explanatory Memorandum lea i luma lea e sau ai le faasamoa faapea, e faaofi le tuuitiitia o tupe gau i le tala o le tupe a le Malo. Ou te lagona pei uma lava e fai sina malosi o lea faamatalaga o lea tatou te le i oo i le taimi e vaai ai pe lelei le aogatupe a Matagaluega i le faaiuga e leai ai se tupe gau. E pei uma lava e le talafeagai le upu lea mo le faaupuga o le mataupu lea. Ae ui i lea lau Afiogai l e Fofoga fetalai o le tau o sikaleti lea i ai nei i le 20 sikaleti i totonu o le pepa po o se mea o le NZ\$27.00. Ae o le tau lea i ai ia tatou e le atoa le \$11 ia ae i ai le manatu pe le silasila i ai le Matagaluega mo se fetuunaiga o le tiute aua e moni a foi o le masima ma le suka ia ae pei o le mea lena e ola ai nuu i tua. O si ou itumalo a maua lava le suka e faasuka ai le koko samoa i le afiafi po o le laumoli, ia e faapena lava ona alumia. Ia ae a toe faaopoopo foi le tau o le pauna suka, ia ona i ai lea o se lagona e pei ua fai sina faigata mo matou. Ae na ona tuu atu o se manatu faapena, e oo foi i le penisini po o le suauu o lo o i ai lava se avanoa e tataua ona tatou tilotilo i ai i oloa nei e ono fetuutuunai ai le tiute, aua o tagata uma lava e fai taavale e ala ai foi ona fai le taavale ona o la foi e i ai sina seleni e utu ai le penisini. Ia e faapena foi le vaalele ma le pasi ma le tele o isi mea, ae o nai o tatou tagata lea e aafia i le suka ma le masima e pei e i ai se manatu faapena. E na ona tuu atu ai o se manatu i lau Afioga i le Minisita e tauala atu i lau Afioga i le Fofoga Fetalai, pe mafai ona toe silasila ane i ai, faafetai tele lava manuia lea aso manuia foi le fonu.

FOFOGA FETALAI: Malo faafetai, se i tulai mai le sui usufono o Anoamaa Sisifo.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

Tofa Hon LAUOFO FONOTOE NUA FESILI PIERRE LAUOFO (Anoamaa Sisifo): Faafetai i lau Afioga i le Fofoga Fetalai ua maua se avanoa e fai ai foi se sao puupuu o lenei itumalo. E momoli atu le faafetai i le Afioga i le Minisita mo lenei foi Tulafono Tau Faaofi e lagolagoina le agaga e taua le agaga lea e aumai ai ona e pei e agai i le taumafai atili ina ia faalelei atili le tatou soifua maloloina. Ia o lea la ua aumai o le a sii i luga ia pasene o excise tax o oloa nei e faaulufale mai i le atunuu.

E pau lava lau fesili ona e faapuupuu sa matou lauga, o le a la le tulaga ua oo i ai le tatou polokalame faalauiloa lea ua tausaga o faagasolo? Po o le mea ua le work lelei na polokalame; po o le mea e le o taliagofie e le atunuu? Aua o le tele ia o seleni lea e faaalu i polokalame ia. O lea foi a matauina o lo o faaaauu isi polokalame i isi afiafi i luga o le TV, le polokalame foi lea faamalositino. O tulaga na o lea e fia maua ai se malamalama po o le mea o lea e manaomia ma lenei foi fesoasoani e toe fesoasoani atili ai ona e faale o work lelei a tatou polokalame na.

O le lona lua, ia o lea ua saunoa isi sui usufono i le tulaga o pasene ia o lea ua ou tilotilo atu o le tele o isi pasene ia e 8% o le tele lava o oloa ia o lo o i ai le suka ma le masima ua siitia i le 8%. A o le suka lava ia ma le masima e 5%, i lau vaai atu pe afai e sao lau faitau. O le talosaga foi la a lenei itumalo, pe mafai lava ona aveese lena pasene i le suka ma le masima ona o lo o faapena ona faaoga e le tele foi o tagata, ae aua le pa le fautua a le Matagaluega faaaauu pea ia le tulaga o fautuaga lelei e aoaoina ai ina ia taumafa tatau. O le tulaga lena e momoli atu pea se manatu o lenei itumalo ina ia taumafa tatau, faaoga faatatau ma fuafua lelei lona faaogaina aua le soona tele aua o le mea la lea e tupu mai ai faafitauli ia o le gasegase o le suka ia ma tele ai i latou e gasegase i le suka ia ma tulai mai ai isi mau faafitauli ia ona mamafa foi lea o le aveaga i le tatou vaega o le Soifua Maloloina i le tatou falemai ia faapea foi gasegase auina atu i fafo, ona o le le faaogaina tatau o nei taumafai. O le fesili tonu lau Afioga i le Minisita, o le a le fuafuaga o le faagaioioiga o le seleni lea? E ao le tupe lea ave sao i le soifua maloloina pe ave i le Matagaluega o le Tupe e faasoa e le Matagaluega o Tupe le tupe lenei? Aua o lea e aumai e fesoasoani i le Matagaluega o le Soifua Maloloina ina ia faaleleia ai ma tuuititia gasegase ia ma fai a latou fuafuaga. E pei o le fesili lea i lau Afioga i le Minisita pe o le tupe e ao ave i le Ofisa o le Tupe ona faasoa ai lea e le Matagaluega o le Tupe pe ave sao i le tatou Matagaluega o le Soifua Maloloina, e fai ai a latou fuafuaga aua ia polokalame o tulaga tau soifua maloloina. Ia pe ave foi e amata ai ona faatino le latou Health Foundation lea ua leva ona taulagi, e faagaioioi ai le polokalame lena aua e pei e mafui i le tulaga tau i le public health i tua i nuu ma afioaga i tua ina ia talai atu ma momoli atu le feau o le soifua maloloina lelei ma taumafa faatatau.

Lau Afioga i le Fofoga Fetalai o le vaega mulimuli o lea e aumai i le tau o le siitaga o le penisini, se i faamanino mai lava ona o au lea ou te le o manino i le tulaga tonu lea.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

O lea e aumai i le saunoaga autu o le Tala Faatatau Autu o le Tupe e 28% le siitaga, a o lea ou te vaai atu i le tatou Tulafono Tau Faaofi e 31%. Pe eseese mea ia e talanoa mai ai le saunoaga autu o le Tala Faatatau o le Tupe, ese le penisini lea aumai i totonu o le Tulafono Tau Faaofi lea aua e 28% ae 31% lea e aumai i i. O nai manatu ia lau Afioga i le Fofoga Fetalai e folasia atu i luma o le Maota tusa ai ma lenei Tulafono Tau Faaofi, faafetai mo le avanoa.

FOFOGA FETALAI: Faafetai, se i tulai mai le sui usufono om Faasaleleaga Nu. 1 Sisifo.

Afioga Hon GATOLOAIFAANA AMATAGA ALESANA GIDLOW (Faasaleleaga Nu. 1 Sisifo): Faafetai i lau Afioga i le Fofoga Fetalai mo le avanoa, ou te faafetai atu i le Afioga i le Minisita mo le Tulafono. E lagolagoina ma e le faateia foi aua o fuafuaga ia ua uma ona faataatitia mai i tatou Tala Faatatau o le Tupe tatou te agai i ai i le siitia lea o mea tau suka ma mea tau gaosia o avamalosi ma tulaga faapena ua uma ona faataatitia mai i le tatou Tala Faatatau o le tatou Tupe e avatu ai le faamalo. Pau lava lau fesili faamolemole ou te fia malamalama ona o le faasamoaina o le tatou Tulafono o lo o faapea mai, Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu. E tau i ai la se fia malamalama aua o suka nei ma masima nei o lo o faatatau i ai le tatou Tulafono ma isi uma mau oloa e le o gaosia i totonu o le tatou atunuu. Pe o lona uiga o le a tatou agai i oloa o lo o gaosia i totonu o le tatou atunuu e faaaoga ai ia oloa nei ma tatou agai ai e ave i ai ni a latou taxation. E pei o le fesili lena o lo o tulai mai, afai o le tulaga lena ia e tau le i ai la le agaga i lena aua a tatou mafaufau i le faaaogaina o le koko samoa lea o lo o faatau i le auala, ia o le koko lena o le koko product lea ua outou tax ina. Ae a oo foi la i le faatauina o keke o lo o fausia i totonu o le tatou atunuu ma faaaoga i totonu o le atunuu e ono aafia ai i le Tulafono lenei. Ae pe e alu le Tulafono faatatau na o oloa ia o lo o aumaia i totonu o le tatou atunuu, ia o se faafesili lea faamolemole, faafetai.

FOFOGA FETALAI: Se i tulai mai le sui usufono mo Faasaleleaga Nu. 4.

Afioga PESETA VAIFOU TEVAGAENA: Lau Afioga i le Fofoga Fetalai faafetai lava i le avanoa lau Afioga. Ae ua ou tulai atu semamanu o lea ua maua le avanoa i le tulaga lea o le faatauaina foi ma le toe siitaga lea o le lafoga lea i nai oloa ia pei o le masima ma le suka. E pei e taua lava le tulaga lea ua aumai nei i le siitaga ae pau foi le mea e tatau ona silasila foi i ai lau Afioga i le Minisita ma le Matagaluega. O so o se tagata lava a alu atu i le faleoloa ae vaai atu e taugata oloa o le mea a e oo i ai ua oso ai i luga ma le toto maualuga ma le pressure. O lona uiga a taugata tele foi se mea ua pressure, a pressure ua e mai ma e totomau aluga ua atili ai lava lea i le taugata o le soifuaga.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

O le talosaga la lea e avatu ma le faaaloalo lava afai o lea ua vaavaai le Matagaluega i se siitaga o tatou lafoga ia pe le tatau ona tau siitia foi lea i se siitaga e gafatia e nai o tatou tagata. Ioe, e taua foi le mea lea na aumai e se tasi foi o sui usufono e taua ia o le lafoga lea, po o le lafoga o le a avatu sao lava i gauta i le falemai ona o le tele foi o mea o lo o fia faaleleia ina ia aua ai nei toe tulai mai mea ia tai pei o le sioki o tatou vailaau, ia aua e iai foi le taimi e sioki ai tatou vailaau ma mea faapena ae taua tele ia nai vaega ia, ma lou faaaloalo lava.

FOFOGA FETALAI: Malo faafetai, ia se i tulai mai le sui usufono mo Falealili Sasae.

Afioga FUIMAONO TEO SAMUELU TEO (Falealili Sasae): Faafetai i le avanoa lau Afioga i le Fofoga Fetalai, avatu le faamalo ma le faafetai tusa ai foi o lenei Tulafono Tau Faaofi. Ae o le matau atu i le Tulafono pei ona fofogaina e le Afioga i le Minisita e pei e faataua foi le vaega o le soifua maloloina, pei o le ala lea o nisi o siitaga lea ua sii maualuga ai. Pau lava le agaga o le sui usufono mo Falealili Sasae, o vaega pei ona tolaulauina o vaega ia e faaoga i aso uma lava. A tagai nei i ai i le siitaga lea iai le 8% e le gata o le falaoa o le masima ia o le suka, ia pei o mataiaia ia e faaoga i aso uma lava ma aso faipea o le olaga. E i ai masima ua fautuaina e fomai e le tatau ona toe faaofi mai i le atunuu ona faapea e maua ai le cancer, masima ia e i ai isi masima saina e le tatau ona toe aumaia. O le talosaga ma le agaga vaivai, se i toe silasila ane lava o lea lava ua oo i le suavai lea faapea o le suavaiauli e aafia i le suavai foi lele e iai minerale ma suavai ua faapuna e iai le ea faimai o la foi e iai le suka i totonu. Ia o lea foi o le a toe sii i luga i le 0.51sene i le litre. O le talosaga faamolemole, afai o lea ua focus ia le Afioga i le Minisita ona o lau matafaioi a o le sailia o tupe maua ia e manaia le sii ae sii i sina 2% ia tatou oloa. A o le sii lea i luga i le 8% ma le 5% ua fai si taugata tele mo le soifuaga, aemaise o nai o tatou tagatanuu e le o maua tele se tupe. Ae tagai ane i le vaega lea ma le fautuaga afai o lea ua sailia ni vaega e faamalositia ai le soifua maloloina ina ia ola soifua maloloina le mamalu o le atunuu ia autilotilo i nisi vaega po o nisi product e taugofie e taofi ai le mea lea o le addiction. Aua e tatou te fiu e sasa le mea lea o le soifua maloloina, ia ae leaga e oo lava i fomai na o le ta lava o le break o i fafo ulaula ae la e silafia lava e i ai vaega e aafia ai le soifua maloloina. E oo foi i le tagata e taumafa pia, o lona uiga o isi vaega ia e tatau ona autilotilo i ai. E le o le faaogaina a o le faitalia a le tagata e fuafua tatau ai lona faaogaina o mea ia e ala ai ona mai. O lona uiga e tatau ona autilotilo i nisi vaega e taofia ai le manao pea manao pea o le tagata e ulaula ma inu le ava malosia ma taumafa ia meataumafa ia e tupu ai le mai. O le isi tagata na ona pei e tino lelei mai ma pei e pae ae maia, ia a o isi tagata e lapopoa pei o au ae o le matua soifua maloloina lava, ma le faaaloalo lava.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

FOFOGA FETALAI: Malo faafetai, masalo o lea ua maea ia sui usufono e fia saunoa. Se i tutulai mai lava sui usufono e fia saunoa i le matupu lenei. Ia e lima la sui usufono se i o tatou taliu mai i le tatou malologa ia ona saunoa loa lea.

E faasilasila atu o le a faataatiaese Taualumaga a le Fono Aoa mo lana malologa masani i le aoauli.

Na faataatiaese Taualumaga a le Fono Aoa mo lana malologa masani i le itula e 10:47 i le taeao ma toe faaauau i le itula e 11:29 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016.

FOFOGA FETALAI: Ou te faasilasila atu ua toe amatalia nei Taualumaga a le Fono Aoa Faitulafono.

E talitonu ua maua le malosi e toe faaopoopo i le Palemene e faaauau ai a tatou galuega i siui o lenei aso.

E faia le malologa o lo o tutulai mai sui usufono e fia saunoa i le Tulafono Tau Faaofi, ma o lea e manatu le Nofoa o le a tuu atu le avanoa muamua lava i le sui usufono mo Alataua Sisifo, o le Taitaifono foi lea o le Komiti o Tupe a le Malo. Ou te tapa ma le faaaloalo lau Afioga i le sui usufono mamalu.

Afioga ALIIMALEMANU ALOFA TUUAU (Alataua Sisifo): Faafetai i lau Afioga i le Fofoga Fetalai mo le avanoa, faafetai i le Afioga i le Minisita mo Tupe Maua i le Tulafono Tau Faaofi e pei ona opea i le Maota. E fia faia se lagona ma se manatu e uiga i le Tulafono Tau Faaofi, ma e momoli atu ai le faafetai i le Tulafono, aua e talitonu o le Tulafono Tau Faaofi ua alagataua ina ia puipuia i tatou e ala mai i le soifua maloloina le mea ua ave i ai le faamuamua a le tatou Malo i le Tala o le Tupe ma le galuega atiae mo le Tausaga Faaletupe 2016/2017, manaia tele lea faatatau.

Ou te talitonu, e ui lava o lo o faau mai e le Matagaluega o Tupe Maua le Tulafono, ae ou te talitonu lava o nei tupe uma i le taga e tasi, ia ona toe faasoasoina lea i Matagaluega taitasi pe fia foi se vaega e ave i le ofisa o le soifua maloloina ma nisi uma Matagaluega, ona o le matafaioi lava lea a le Ofisa o le Tiute. E talitonu o lo o i ai foi le aiatatau a le tagata faatau e vaavaai i ai i le oloa ae na te le i faatauina, o i ina, ou te maitau lava e au, o la e i ai le pasene o le suka, la e i ai le pasene o le masima i so o se oloa lava e te faatauina, vagana suka la e faatauina i pepa iila.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

O i ina foi la e fuafua ai e le tagata lana faatau, po o le mea la e tele le suka, po o fea le mea la e tele le masima, aua ou te iloa o le Tulafono lena, e tatau ona i ai pasene o mea nei i fafo i le package ina o oloa ina ia mafai ona fai le filifiliga a le tagata i le oloa ae na te le i faatauina.

I le faaupuga lea o le tuuaititia ai o le tupe gau i le 3.5%, ou te talitonu lava i so o se Tala Faatatau lava o le Tupe e taumafai e faaititia tupe pau po o i ai sina tupe faasili, e tatau lava ona i ai sina siitaga i tupe maua, ae ou te talitonu, o le aotelega o le tupe maua lea ua fuafua mo le masima ma le suka, ona o le prevention e auala mai i le Ofisa o le Soifua Maloloina, ona o lea ua maua e le toatele le siitaga o le auina atu o tatou gasegase i fafo. O lea sa maitauina e le Komiti o Tupe, o lo o aafia ai i le Tala o le Tupe lea faatoa uma ona tatou pasi atu i le Aso Faraile le siitaga o le tupe lea, lea ua tuu mai i le Maota le Tulafono. O lona uiga, afai ae le pasiaina le Tulafono Tau Faaofi, e tatau ona tatou toe fetuunai le Tala o le Tupe ia ona toe aumai foi lea i totonu o le Maota e pasia. Ma i le saililiga a le Komiti, e le i atoa se \$7,000 o le tupe maua mai le masima, e laitiiti lava le tupe o lo o maua mai ai, e ui e tele le pasene, ae laitiiti lava le tupe e maua mai ai, e faapena foi i le oloa lea e maua mai i le suka, e le atoa se \$48,000 o le tupe maua a le Malo i le tausaga atoa o lo o maua mai ai.

E pei o tulaga o lou tulai atu lau Afioga i le Fofoga Fetalai, na ona faamanatu lava i le mamalu o le Fono, o le Tulafono lea ma le pasiaina, ua uma ona i ai le siitaga lea i totonu o le Tala Faatatau o le Tupe pei ona pasiaina i le Aso Faraile na tea nei. Ma le faaaloalo lava lau Afioga, faafetai.

FOFOGA FETALAI: Malo faafetai. Se i tulai mai le sui usufono mo Faleata Sisifo, ona sosoo ai lea ma le sui usufono mo le Itumalo Tu Taulaga i Sisifo.

Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai mo le avanoa.

E muamua foi ona ave le faamalo ma le faafetai i le Afioga i le Minisita mo le Tulafono Tau Faaofi, ae i ai nai fesoasoani ma atugaluga ia a lou sui usufono. E leai lava se isi o tatou e le manao e maua ni a tatou tupe faaopoopo, aua le fesoasoani i le tatou Tala o le Tupe. O le faaupuga foi o le Tulafono Tau Faaofi mai lava amataga, o Lafoga o Oloa e Gaosia i le Atunuu, ae o lea ou te tilotilo atu i le tele o oloa ia e aumai, o oloa mai fafo. Aua i lou lava talitonuga, e ono feteenai le Tulafono ia ma le manulauti a le atunuu ina ia fesoasoani i le atinaeina o oloa e fausiaina lava i totonu o Samoa, aua o lea e tatou te taumafai e uunai le oloa e fausia i totonu o Samoa i lo oloa ia mai fafo. O le isi vaega o le faapea mai o le Tulafono, ina ia faaopoopoina ai le tupe maua, ae faalaititia ai le tupe gau. A o lea pei o le mea lea e aumai i le Tulafono, pei o se Tulafono a le Soifua Maloloina, na te ua tele fesili i lau Afioga, a o lea pei e foliga mai o mea e faatatau i le soifua maloloina o le tagata.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

O lea la ua e tolaulauina mai pasene o glucose ma le langose, ae ou te le o iloa po o malamalama ai lau Afioga. Po o le mea o mea ia a le soifua maloloina, aua e fiafia tele le Afioga i le Minisita mo le Soifua Maloloina i mea ia.

Lau Afioga i le Fofoga Fetalai, pei lava o le mea lea e tulituli atu pei ona saunoa nisi o sui usufono, e i ai mea ia ua sau i i sa tatau ona toe tagai i ai lau Afioga ua tetele pasene, mea ia o falaoa lea e faaaoga i aso uma, o le suka, o le raw sugar o lea e 5%, o le suka lea e i ai e tatau ona faamalosia e faaaoga e tagata pe afai, a o isi mau suka ia e aumai o zero ma isi mea o lea e tatou te iloa, o le matua leaga lava o ia suka. A o le a le mea e faataga ai ona aumai? Ae matua tuu i luga le pasene. O le isi mea o mea ia e fai i le koko Samoa ma le banana chips lea e sau ai, o chips ia e fai iinei i fai ma mea na, lau Afioga o mea na e tatau ona toe tagai lau Afioga pe tatau ona lavea i le excise lea pe tatau ona tuatalaloa mea ia, ae adjust ia mea ia e tele le faaletonu mai fafo, aua o mea ia o lea e faaaoga e tatou. A o le isi mea e aupito sili ona taua, o le vai, o le vai auli lava ia lau Afioga, e le tatau, sa tatau ona zero rate le vai auli, me no water ma na mea na o isi vai ia....aua o lea ua aumai nei, a tagai lau Afioga i le faaupuga o lo o i ai, suavai auli, ia ma vai e i ai i totonu le suka ua faaopopo. O lona uiga, o lea ua tutusa le suavai auli ma le vai e i ai le suka e i ai le suka i totonu. E le tatau ona i ai se....e tatau ona zero rate le vai lea auli, ina ia encourage tagata e inu aemaise tamaiti aoga, ae faamamafa le tax i mea ia.

O le uiga o lau faamatalaga lau Afioga ma le mamalu o le Fono, a tatou tuua i luga le tax i le tele o basic needs nei ma meaai nei, e safa le tagata e maualalo le tupe maua, e alu lava le mamafa o le avega i le tagata e maualalo le tupe maua, aua e fai mai e te alu atu fai lau filifiliga, e te le filifili i le mea e te loto i ai, e te filifili i le tupe lea e i lau taga, o le mea e gafatia i lau tupe, o le mea lena e te faataua. O tatou uma lava e tatou te mananao i mea lelei ma mea taugata, ae fua lau filifiliga i le mea o lena e te afford ina ma le mea o la e lava i lau tupe o lo o i lau taga. A fetuunai le tau o mea nei, e uma ane lava, e safa lava le auvaega e pito i lalo, a o mea o lea e manaomia le faaaoga i aso uma. E oo i mea ia o sipili. Faafetai i lau Afioga ona o lea ua tele le suiga mai talu ai ona o le Tulafono sa i ai muamua, pei a alu i luga le sipili ae alu i lalo le excise, a o lea ua faasao mai i i, pau lava lau fesili lau Afioga, o le a le mea e eseese ai sipili? O le a le mea e ese ai le whisky, ese le rum, ese le vodka, ese le gin? Aua e i ai lou talitonuga e tatau ona tutusa uma lava, o le sipili lava o le sipili, a o lea pei e pau mai laititi le tax o isi sipili, ae le faaalu faalaina tutusa. Aua a tatou talanoa loa i mea o meaai lau Afioga, o meaai ia e fiafia ai le tele o tatou o le pisupo o povi masima ma na mea, o mea la na ua tatau ona tax. A o le mea lea ou te alofa ai i lau Afioga, aua pei o oe o lau matafaioi o le tagai lelei i tupe maua a le Malo o lo o faia lau galuega fai. E tele le tupe lea ma le faamoemoega i ina, ae pei o le uunaiina, pei e foliga mai, mo le soifua maloloina.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

A o le fesili i lau Afioga i le Minisita mo le Soifua Maloloina, aua o lea e tau le misi lava le tausaga ma sii le tax i luga o mea nei. Ae po o le a se tulaga o i ai ia le tulaga o le soifua maloloina i le aotelega, pe o aoga? ia le tulaga faapena aemaise lava le tatou SPAGHL foi lea sa fai.....

FOFOGA FETALAI: Malie le sui usufono o lo o saunoa, se i tulai mai le faauilavea a le Afioga i le Minisita mo le Soifua Maloloina.

Afioga Hon Tuitama Talalelei Tuitama (Minisita mo le Soifua Maloloina): Lau Afioga i le Fofoga Fetalai, a lea ua faalua ona saunoa le sui usufono e agai mai ia te au, ae silasila foi lau Afioga ma le mamalu o le Maota, o le Tulafono Tau Faaofi lenei e le o se Tulafono Tau Faaofi a le Soifua Maloloina, e aoga le Tulafono i le soifua maloloina, ae le o se Tulafono a le Soifua Maloloina. O le mea lea e faamanatu atu i le sui usufono, e agai pea ana fesili i le e ona le Tulafono. A i ai se fesili e agai mai ia te au, ia tatou talanoa i le soifua maloloina pe aumai se matou Tulafono, ma le faaaloalo lava.

FOFOGA FETALAI: Malo, o lea ua maua le.....ia faapuupuu mai le saunoaga a le sui usufono.

Tofa LEALAILEPULE RIMONI AIAFI: Faafetai lava i le Afioga i le Minisita mo le Soifua Maloloina, ua tuuai i le Minisita mo Tupe Maua ia le la Tulafono.

Ia o le fautuaga la lena i lau Afioga, e le gata i lea o le penisini, e tatou te pisa fua i le tau o le soifuaga lau Afioga, ua tele lava le fesoasoani o le tau o le penisini i le tau o oloa. O le taimi lea e sii ai le tau o le penisini, o le excuse lava lea o so o se tagata ma so o se faioloa ma so o se mea e te alu i ai, e taugata le penisini. A o lea la ua pau le tau o le penisini, ia o le fesoasoani malosia lea i a tatou oloa, ae afai la e toe sii, lelei ou te lagolagoina le 28% lea e ave i le levy lea mo malae vaalele. A o le 3% lea e ave i le faaaogaga o fuel tanks, se i tagai ai lau Afioga pe le tataua ona lafo i tagata ia e malo i le suppliers, aua e tataua ona tuu i totonu o le latou tau ia le faaaogaina o tanks nei, i lo le toe tuu mai luga i le tau o le penisini, ia e toe alu loa i luga le tau o le suauu, e alu uma lava i luga le tau o mea o le soifuaga. Ae lagolagoina le Tulafono Tau Faaofi, ae pau lena o le mea lau Afioga i le Minisita, se faamolemole, se i toe tagai ane lava i a tatou oloa ia e fai iinei. O le tau o le falaoa, o le vai auli, ina ia lavea i lalo o le zero rated ina ia faigofie le agai i luma aemaise ina ia alofia mai ai le faaaogaina soo o mea e le tataua ona faaaogaina, ma le faaaloalo faafetai.

FOFOGA FETALAI: Malo, ia tulai mai le sui usufono mo le Itumalo Tu Taulaga i Sisifo.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

Afioga FAUMUINA ASI PAULI WAYNE FONG: Faafetai i lau Afioga i le Fofoga Fetalai mo le avanoa, ae ao foi ona avatu se manatu i le tulaga o le Tulafono Tau Faaofi ua faataatia nei i luma o le Palemene, faafetai atu i le Afioga i le Minisita.

E faanoanoa lava e tilotilo atu i le tulaga lea ua aumai i le siitia o oloa ia, pei ona silafia foi e le tatou atunuu, e toaitiiti lava i latou e aafia i le tulaga lea, a o lea ua aafia ai le lautele o Samoa. O le uiga o lau faamatalaga, a alu lava le tagata e manao e fuafua lelei lona soifua maloloina ia aua neʻi maua i faamai nei, e le tatau ona lau e faatau mea ia. A o le tulaga lea ua i ai, o lea ua sii faalauaitele atoa, ua aafia atoa ai, ona o le faatamala o i latou e toaitiiti. I le tulaga i le siitiaga lea ua siitia, o le siitiaga lea ua i ai, o mea ia e masani ona manaomia e aiga taitasi aua le soifua foi, e le gata i le soifua maloloina, a o le tuputupu ae o a tatou fanau aemaise o tagatanuu o Samoa. E talafeagai le tulaga i le ava malosi ma le sikareti aua e le faapea o aafia uma ai tagata uma o Samoa i le taumafaina o tulaga ia, a o lea la ua toe siitia atu ai ma isi...e vagana ua i ai se fuafuaga a le Ofisa o Tupe mo le siitia o tupe maua. Ae talitonu le agaga, e tatau ona toe tagai lelei i ai, e faapea e na o le masima lava ma le suka, a o lea la ua aafia ai le lautele, ia e sau foi, e 4 i le 5 laupepa o lenei faamoemoe. O lea e toe tatalo atu ai ia toe tagai lelei i ai le Komiti pe a oo atu i ai, e i ai mea ia e tatau lava ona tuu i le aiatatau a tagata e manao e faatau mea ia, a o lea la o le a aafia uma ai ia le atunuu atoa, ona o le faatamala foi o nisi e toaitiiti, aua le le tausi lelei o le soifua maloloina.

Ma le faaloalo lava faafetai.

FOFOGA FETALAI: Malo, tulai mai le sui usufono mo Falealili Sisifo ona sosoo ai lea ma le sui usufono mo Anoamaa Sasae, ona maea ai lea o sui usufono o lo o saunao.

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai ma le mamalu o lenei Palemene, faafetai mo lou avanoa. E muamua ona momoli atu le faafetai tele i le Minisita mo Tupe Maua e tusa ai ma lenei Tulafono Tau Faaofi, faafetai foi i le Minisita o Tupe aua o lea sa taua i lana lauga le siitaga e 5%, peitai o lea ua silasila atu i le Tulafono Tau Faaofi lea ua oo i le 8%, lona uiga e le o lava tupe e aoina mai i le tulaga lea.

I le tilotilo i ai i le tulaga o le siitia o pasene ma sene, e i ai le talitonuga e sii ai foi ma le tau o isi mea taitasi tai pei o le eletise, o le vai, aua ua faaogaina le tatou kiso, ae le gata foi i lea e toe sii foi ma le tau o le sikareti i lalo o le Komiti Faatino o le Tau o Oloa o le sikareti ma le pia. E talosaga atu ai ma le agaga faaloalo, ia silasila totoʻa po o talafeagai siitaga ia mo i latou o le latou a faitalia po o le tagata faatauolooa consumer e filifili ai e ulaula tapaa pe taumafaina le avamalosi, ia po o talafeagai ia vaega ina ia mafai ai ona maua le tupe maua aua le faatinoina o polokalame a le tatou Malo. Ia o le faamatalaga lea ia manuia le fonu.

FOFOGA FETALAI: Tulai mai le sui usufono o Anoamaa Sasae.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa Sasae): Faafetai mo le avanoa i lau Afioga i le Fofoga Fetalai, o le Tulafono e tele le aafiaga o le tatou atunuu aua e mautinoa lava o le a siisii i luga le tau o le soifuaga. O le mea foi lea e tataua lava ona silasila lau Afioga i le Minisita, e fetuutuunai ai le mea lenei aua foi nei o tatou naunau i le tupe maua ia ae silasila lava i le lautele o le atunuu o lo o i ai lava le tulaga i le tagi mai i le faamoemoe i le tau o le soifuaga. E sao lelei le Minisita mo le Soifua Maloloina e le feaiaaā ae pei o lea o le a faasifo i ai le Tulafono ina ia lagolagoina ai le mau lea ua aumai. A o le mea moni lava ia o le matou lava lagolago e lagolago i mea nei o penisini, ava malosi ma tapaa. A o mea a ia e manaomia e nai o tatou tagata i tua e mafai a ona iai le avanoa e toe fetuunai ai, o le 8% mal e 5% e le o se mea laitiiti. Ia pei na o le pau lea o se talosaga a lenei itumalo, se i toe silasila ifo aua o tagata e feoai i taavale o tagata ua maua ia le tamaoaiiga ia ae sei toe tagatagaā e faasaoina mai aemaise a le tulaga lea i le suka. O le mea lea o le suka ma isi ituaiga mai e fuafua i le consumption po o le taumafa po o le faaaogaina, a e taumafa foi i le talo na o le talo a i le vaiaso atoa e te mai foi. E te gasegase aua ua le lava le insulin lea e sau e faapena ona breakdown ai carbohydrates, e faapena le mea o le taumafa i meaai ia. Ae a e taumafa paleni a ma fai le faamalositini e te le mai, o le mea foi lea na faasa ai mulipipi e agai foi i le soifua maloloina. O fea la o i ai? Ia lea lava ua toe tatala mai foi aua sa tautuuai foi i lona oloa e mafua ai le suka e mafua ai le toto maualuga. Ia a o lea ua toe tatala foi, o le mea lenei faiatu ai aua le faia e ufiufi ai ona o le soifua maloloina a o le mea lava lenei a le tagata ia e fai i lona taimi avanoa o le tausi o lona soifua maloloina.

Ia ma le agaga faaloalo faafetai.

FOFOGA FETALAI: Se i tulai mai le Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE AIONO NEIOTI GALUMALEMANA DR. SAILELE MALIELEGAOI (Palemia): Lau Afioga i le Fofoga Fetalai masalo e misi atoa e le Maota le faamalamalama sa ou aveina atu. O le uiga o faiga faakapeneta po o ai le Minisita e alu atu ai le Tulafono o le Tulafono a le Kapeneta atoa. O lona uiga e le o se Tulafono a le Minisita o Tupe o le Tulafono a le Kapeneta atoa ma le vaega atoa. Ou te fia tau atua le itu lenei ona e tele lava finagalo lea e faaalua e tuu pea i le aiatatau a le tagata ia. E tau loa le mea lea o le tuu i le aiatatau a le tagata ia o se lafoga aupito i faavalevarea lea ua ou faalogo i ai. Aisea? O le maā lea NCDs e 8 maā e o faatasi, e ofaatasi a ma e ova i le 75% tagata e feoti ai i maā ia aafia i meatausami. O lea ua ave i ai le faataua e Minisita uma lava o le Pasefika o le soifua maloloina lea e faalupu o maā le pipisi. Sa ou taofia le faaaogaina o le term lea ona e ono faaoga sese pei la o lauga ia e fai mai e lelei le mamai ai pea ii aua e le pipisi.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

O le sao o le tauga o maʻi nei o maʻi fasioti tagata ona o mai ia lea pito tele tagata ia e feoti ai. O le mea lea sa ou alu ai nei i Suetena o le mea tonu lava lea o lea e agai i ai le lalolagi, o le taofiofiga o taumafa nei o lea e toatele tagata ia e mamai ai. E le na o le mai suka, o le mai suka na o se tasi o mai ae lavea ai foi ma isi mau mai pei o le mai o le fatu, kanesa e lavea uma ai lava. O mai e mafua mai i mea e te tuuina i totonu o lou gutu, e aofia ai ma le tapaa. Lau Afioga i le Fofoga Fetalai o mea uma lava na e i ai le whiskey, tago i le whiskey, tago i le tapaa. O mea lava nei o mea tau taumafa, e tiga lava l ono taumafa, ae ai lava e afua i le aivale o le tatou atunuu ma e amata ona aoao ai a tatou fanau o laiti. O le upu lea talofa i nai fanau, amata ona aoao ai a tatou fanau o laiti ina ia masani i meaai lelei e umi ai le soifua.

Lau Afioga i le Fofoga Fetalai o le ala lena lea e alai ona taua ia tiute nei va faataoto atu. Ou te faafetai ai i faipule o lea e lava le lototele ma le vaai mamao, e ala ona ou faiatu o vaiaso uma, vaiaso uma, vaiaso uma e oo i le 10 ia maʻi e aumai i le Kapeneta e fiaola ae afua i mea ia. E afua i mea ia e faasa atu nei, o le tatou olaga lea tatou te ola ai nei, afai ua le mafai e le tagata ona fuafua e le tagata lona soifua, ua tataua loa ona laa i ai le Malo i totonu e faatulafono. O le tele o mea ia e tutupu nei i le tatou atunuu ua le mafai e tagata ona pulea e latou ia latou lava. O le ala lea o lea e laa atu i ai le Malo e faaoga ia le tulaga lea o tariffs e tuu i luga ina ia taofiofi ai. O lea foi e faapasene, o mea o pasene e leai lava se mea e ese ai ma le VAGST na matua savali ai tagata ma tetee, ae sau le pasene ia e laiti lava nai sene a o lenei o le a alu le aso atoa o talanoa le tatou Tulafono.

Lau Afioga i le Fofoga Fetalai, o le ala lena lea ou te tulai atu ai se i tau faasao le mea lea tatou alolofa e i ai tagata e ola ae le mafai ona vaai e latou o latou soifua maloloina, ma o lea e iu mai lava i le Kapeneta. E ova i le \$10milion le tupe ma e na o Samoa lava lea i ai se tupe tele faapea, o Tonga ma Fiti na o le \$100,000 a o isi atunuu e leai se seleni o faaavanoaina mo tagata e ave i Niu Sila ae na o Samoa a lea ua oo i le \$10milion ma sili atu ona o le toatele. O le mataga ia o le mea lea e sau nei o tagata aupito sili ona tele le suka ma diabetic o Samoa i le lalolagi atoa. O le mea lena lea alu nei i fafo, o Samoa. Lau Afioga i le Fofoga Fetalai, o le ala lena e le o ni mea soona faia e le o ni Tulafono soona fai, o Tulafono ua uma ona fuafua lelei.

FOFOGA FETALAI: Malo saunoa i lau Afioga i le Palemia, se i tulai mai le Minisita mo Galuega, Felauaiga ma Atinae Eeseese.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eeseese): Faafetai i lau Afioga mo le avanoa na o se mea e fia malamalama ai lou nei sui usufono i le Tulafono, ona o lau matau o le Tulafono lea e tau pasia ai ia le tau faatulaga o excise taxes a o lau matau ua uma ona pasia uma mea i totonu o le Tala o le Tupe. Ou te le o iloa la po o fea e agai i ai le tatou faatalanoaina o le Tulafono a o lea ua uma ona pasia le Tala o le Tupe lea ua taatia ai fuafuaga ia a le Malo i excise taxes ia. Na o se mea e fia faamalamalama lau Afioga, faafetai.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

FOFOGA FETALAI: Ia manaia, malo manaia le saunoaga a le Afioga i le Minisita mo Galuega. Ia tapa lau Afioga i le Minisita mo lau saunoaga e faamalamalama nisi o mea sa laga e sui usufono mamalu a o lea a ua saunoa le Palemia e cover atoa ai mea sa laga e sui usufono mamalu.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai, ou te iloa o le saunoaga lena a le Taitai o le Malo ua cover uma ai ia saunoaga a sui usufono sa laga mai manatu i lenei Tulafono taua, ona o le Tulafono e aafia ai le soifua maloloina. E moni lava ae o le Tulafono Tau Faaofi e taumafai e faafoia le tino malolosi o tatou tagata aua foi le agai atu i luma o le mamalu lautele o le atunuu. Na o le tasi lava le fesili lea ou te fia tali atu i ai lea faapea mai, po o le tupe lea e ave i le Ofisa o le Soifua Maloloina? E leai e aumai uma lava ave i le Ofisa o Tupe ona faasoa atu ai lea, o le ala foi lena lea e tele ai le fesoasoani a le Malo mo le Ofisa o le Soifua Maloloina i tausaga uma. O le tele o isi manatu ma finagalo na faaalua, ia o lena ua uma ona tali atu i ai le Taitai o le Malo, faafetai.

FOFOGA FETALAI: Tulai mai lau Afioga i le Minisita o Tupe.

Afioga Hon Sili Epa Tuioti (Minisita o Tupe): Lau Afioga i le Fofoga Fetalai tau lava ina toe faaopoopo atu i le faamalamalamaga ia pei lava ona i ai foi i le Lauga o le Tala o le Tupe, o fesiitaiga ia i tatou lafoga ma tiute ma tulaga faapena. E lua ia mafuaaga, o le tulaga tau penisini ma tulaga faapena ona o le faatupeina o le eseesega lea o tatou tupe maua ma a tatou tupe faaalua. O le fesiitaiga i tiute ia po o excise i tulaga ia pei o meataumafa ia na tatou talanoa i ai, o le mafuaaga tonu lava o le taumafai lea o le soifua maloloina o tatou tagata. E le faapea na fai ina ia maua ai ni tupe maua e lagolago ai isi polokalame. Sa i ai foi se fesili i le tulaga foi lea, po o le a le mea ua toe manaomia ai a o lea foi e fai ia polokalame faalauiloa a le Matagaluega? O le manatu, e tatau ona o faatasi mea ia e lua o le tulaga o le faalauiloa ia ma fai ma le tulaga lea o lafoga ina ia faaitiitia ai le faaaogaina e tagata o oloa nei ma o lea tatou te iloa lelei ma ua i ai foi ia suesuega a fomai i totonu o atunuu o le Pasefika, ia ma tatou o lo o tele ina mamai ma afaina ai o tatou tagata pei ona taua ia le \$10miliona o lo o faaalua i le auina atu o le toatele o tatou gasegase i Niu Sila ona o togafitiga, aemaise lava i mai ia ma gasegase ia e mafua mai ona o oloa ia ua faaopoopo ai le vaega o tatou tiute ia.

O sina fesoasoani atu lena i le faamalamalamaga a le Minisita mo Tupe Maua.

FOFOGA FETALAI: Malo faafetai, ia lea ua manino. Tulai mai le sui usufono mo Anoamaa Sasae.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai o si vaega lava lea e tasi, sa ou fesiligia i le tulaga foi lea o le 28% ma le 31% lea sa ou fesiligia. Po o le mea e eseese pe i ai se faasaoga e tatau ona fai i le mea lea ae le i pasia le Tulafono i le tau o le penisini?

FOFOGA FETALAI: Malie mai le Afioga i le Minisita, se i tulai mai lava le sui usufono mo Falealupo sa tau tuu atu le avanoa ae peitai e te le o utagia mai le faatonuga a le Fofoga Fetalai.

Afioga Hon Aeau Peniamina Leavaiseeta: Lau Afioga i le Fofoga Fetalai ou te tulai atu lava ma le faaaloalo.

O le mataupu lea i le vai, aua o Samoa o lea o le a faatau le vai pe a e fia taumafa i se vai lelei. E pei o le mea lena ua ou tulai atu ai, o le vai o se mea fou ia tatou pe a faatau sau vai. E le afaina la lau Afioga aua ou te talitonu mo le tagata mai fafo, pau lava o lea. E i ai se fuafua a le Malo e mafai ai ona faaleleia a tatou vai ae aua le totogiina seiloga o le vai faapitoa ona faatoa inu lea ae lelei? E leai lava se fesoasoani a le Malo e aoga ina ia maua le tatou vai aua o lea ua alu i paipa ina ia treat lelei ina special way. A o le taimi lenei, vai totogi pei se mea fou.

FOFOGA FETALAI: Ia te au le faaaloalo e tuu atu lava le avanoa ona o le tulaga o le tatou avafatafata ia ae le i saunoa le sui usufono o lea ua tali le Minisita. Ae ui o lea e faigata foi le va ma le alii matua o lea itu o lo o faapea ona agaia le Malo. A o le sui usufono mo Faleata Sisifo o lo o tulai mai, ia o lo outou lava lea finagalo a le faamalieina i le faamalamalamaga a le Malo ia o le faamalamalamaga lava le Malo o le mutaaga lena. Ae le faia i se mea e finagalo i ai le sui usufono, e le faamalieina foi e le Malo le finagalo o le sui usufono. O le faamalamalamaga lava ua i ai le finagalo o le Malo, ia malie le sui usufono o le faamalamalamaga lena.

Tofa Lealailepule Rimoni Aiafi: Pau lava le mea sa ou fesiligia le fautuaga i le Afioga i le Minisita e toe tagai i ai, tusa pe le toe tali mai. E i ai nai tatou mea ia o chips fai ia e fai i inei, o nai mea na, o nai mea na e tatau ona toe tagai i ai, ona e pei o mea na o lea e tele na moomia e ave i fafo ma tulaga faapena, ae o oloa ia mai fafo, ou te le o popole i ai. O oloa ia e fai i inei, o lena e futua atu i ai, e toe tagai i ai ia ma nai mea ia o koko Samoa ma mea faapena ina ia fetuutuunai ai, ma le faaaloalo lava.

FOFOGA FETALAI: Ia faafetai, ia faamaea loa le saunoaga a le Minisita atonu o le a le aafia lea vaega.

Afioga Hon TIALAVEA FEA LENIU TIONISIO HUNT: Faafetai lava i lau Afioga i le Fofoga Fetalai mo le avanoa.

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 - faitauga faalua

I le tulaga lea o le eseeseega o le 31 ma le 28sene, e 31 le siitaga lena i totonu o le Tala o le Tupe i le itulau e 10 e 3pasene faaopoopo i le 28 o lo o i ai nei i fuel ia o lo o teu i totonu o terminal lea e i ai tane suauu e 3sene lea e faaopoopo i ai ona maua lea o le 31%. O le siitaga lena o le eseeseega lena ona o le siitaga lea o le 3% o lo o faaopoopo i ai. E pei ona faamalamalama atu i le amataga ona o le a le toe totogia mai e Kamupani Vaalele ia Excise Tax mo penisini ia latou te faaaogaina lea la ua tuu i terminal i le mea lea e faaputu i ai penisini lea e utu ai vaalele i Faleolo ma uta i Fagalii, ia aemaise foi tai i le Depot. O le faamalamalamaga lena o le eseeseega. O le vai lena o le vai faapuna e i ai le ea, o so o se apainu lava la e tatala atu, o vai lena ae le faapea o le vai. O spring waters ia lea faapea ona tatou faaaogaina ua faapupuna lea ua i ai minerale i totonu ona faaopoopo i totonu o flavour pei o vai ia e i ai ia apainu, faguinu. O le isi tulaga i le excise tax lea, ona o le WTO i le taimi lenei o lo o ua tutusa lava le local ma mea ia e auina mai i totonu. Ae o le agaga lea e taumafai i ai, ia faalaitiitia pea ia tiute o mea nei, ia e talitonu i le agai atu i luma o la foi o le a tapena mai le toe tagatagai o le Matagaluega i le Tariff atoa lava, e i ai foi ni vaega e faapau e i ai foi isi vaega e toe faaopoopo e pei o le agaga lena lau Afioga i le Fofoga Fetalai, ia o le vai ia o le auga tonu lava, o vai suamalie, e i ai ia apainu, lavea ai tatou i inei ma apa o lo o auina mai i fafo.

Faafetai lava i lau Afioga.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 i lona faitauga faalua.

TULAFONO TAU FAAOFI O TEUTEUGA O LE TULAFONO O FUA FAATATAU O LAFOGA O OLOA E GAOSIA I LE ATUNUU 2016 – iloiloga auiliili

FOFOGA FETALAI: Talu ai ua maea ona faamaonia le lafo o le Tulaga Faanatinati o le Tulafono Tau Faaofi lenei, o lea o le a sagai atu loa le Fono Aoa mo le iloiloga auiliili.

E tusa ai ma le Tulafono tumau 102, e amata le iloiloga auiliili i le Fuaiupu 2.

FUAIUPU 2: Teuteuga i le Faamatalaga.

Faamaonia

FUAIUPU 3: Teuteuga faatupulaia.

Faamaonia

27 IUNI 2016

Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 – iloiloga auiliili

FUAIUPU 1 MA LE IGOA:

Fuaiupu 1 Igoa puupuu ma le amataga.

Igoa: Teuteuga o le Tulafono o Fua Faatatau o Lafoga o Oloa e Gaosia i le Atunuu 2016.

Faamaonia.

Na faagasolo le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2016 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O TULAGA O TAGATANUU 2016 – faitauga faatolu

FOFOGA FETALAI: Talu ai ua maea ona faamaonia le lafo o le Tulaga faanatinati o le Tulafono Tau Faaofi lenei, o lea o le a sagai atu loa le Fono Aoa mo le faitauga faatolu. Tulai mai lau Afioga i le Minisita o Tupe Maua.

Faaluaina e le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

FOFOGA FETALAI: Talu ai ua faamaonia le lafo e faataatiaese ai Tulafono Tumau e 101 puipui 1, o lea ua toe fetuunai ai galuega o le Aso Tau le Malo mo le faitauga faalua o Tulafono Tau Faaofi.

O lea ou te tapa muamua ai le Minisita mo Faamasinoga ma Pulega Tau Faamasinoga.

TULAFONO TAU FAAOFI O TAGATA E SUESUEINA MAFUAAGA LILO O MALIU 2016 – faitauga faalua

Afioga Hon FAAOLESA KATOPAU T. AINUU: Lau Afioga i le Fofoga Fetalai, ou te faatu le lafo, ina ia faitauina nei ia Tulafono Taufaaofi o Tagata e Suesueina Mafuaaga Lilo o Maliu 2016 i lona faitauga faalua. Ou te fia tautala e faamalamalamaina ai.

Faaluaina e le Minisita mo Tina ma Tamaitai, Minisita mo Fesootaiga, Faamatalaga mo Fesootaiga Vavave Faaneionapo.

27 IUNI 2016

**Tulafono Tau Faaofi o Tagata e Suesueina Mafuaaga Lilo o Malii 2016
– faitauga faalua**

FOFOGA FETALAI: Ou te tapa lau Afioga i le Minisita mo lau saunoaga faamalamalama.

Afioga Hon FAAOLESA KATOPAU T. AINUU: Lau Afioga i le Fofoga Fetalai, o le Tulafono lea na faamalamalama muamua. O le Tulafono lea e sui ai le Tulafono ua taua o le Coroners Ordinance 1959. O lona sini ma lona mafuaaga, o le faamoemoe o le Tulafono Tau Faaofi lenei, e faapea:

Muamua, ia aiaia ai mo se faiga e suesueina ai mafuaaga lilo o malii faafuasei, po o malii e le o maua mafuaaga, po o malii e tulai mai i tulaga faapitoa e ese ai, e ala i sailiiliga ma suesuega e faamautu ai, le mafuaaga ma tulaga aliae mai, o lea malii.

Lua, ia faatulaga ai galuega tauave malosiaga ma tiute o tagata suesueina mafuaaga lilo o malii.

Tolu, ia aiaia ai taulumaga e ao ona tauave e tagata sailia ma faia suesuega o mafuaaga lilo o malii.

O lea la e faatulaga mai ai i le vaega muamua o le faatomuaga o le Tulafono ua taulimaina e a outou Afioga ia lea Tulafono.

Vaega 1 ó Faatomuaga, Vaega 2 - Tagata e Suesueina Mafuaaga Lilo o Malii, Vaega 3 - Lipotiina o Malii ma Taotoga mo le Suesueina o Mafuaaga Lilo o Malii, Vaega lona 4 - Sailiiliga ma Suesuega o Mafuaaga Lilo o Malii, Vaega 5 - O isi Tiute Tauave ma Malosiaga, ma le Vaega lona 6 ó Aiaiga Eeseese o lea Tulafono.

Ma le faaloalo lava lau Afioga i le Fofoga Fetalai.

FOFOGA FETALAI: Malo faafetai, saunoa faamalamalama i lau Afioga i le Minisita o Faamasinoga. Ia ma o le avanoa lenei, tatala foi le avanoa mo sui usufono o le Palemene e fia saunoa e tusa ai o lenei Tulafono Tau Faaofi. Ia afai e leai, o le a tuuina atu le fesili,

Afioga Tafua Maluelue Tafua: Lau Afioga i le Fofoga o le Fono, e le fia faalavelaveina lava lau Afioga ma le saunoaga, ia ae tasi lava lau fesili lea na fai ae lei talia foi i le workshop o lea e i ai le Vaega 12 i le itulau e 13 o le Tulafono, o le vaega lea i le vaitaimi o le tofi. Na ou fesiligia ai le 5 tausaga o lea e mafai ona tofia mo le vaitaimi e oo atu i le 5 tausaga le Coroner po o le e suesuea malii le agavaa mo le toe tofiaina. O le taimi nei o faamasino e manino i lalo o le Tulafono e 68, ma e i ai le agavaa e toe tofiaina ai. E faaopoopo le isi 2 ea pe 1 le tausaga e fuafua i fuafuaga a le Komisi. Lona 2 e i ai foi isi vaega e eseese ia tausaga o tofiga. O lau fesili la ma le faaloalo, pe aisea ua 5 ai le vaega lea ae le tuufau pea i le 68 tausaga ona toe faaopoopo lea? Ma le faaloalo.

FOFOGA FETALAI: Ia tulai mai loa lau Afioga i le Minisita mo Faamasinoga ma Pulega Tau Faamasinoga.

27 IUNI 2016

**Tulafono Tau Faaofi o Tagata e Suesueina Mafuaaga Lilo o Malii 2016
– faitauga faalua**

Afioga Hon FAAOLESA KATOPAU T. AINUU: O le fuafuaga lava lea a lo tatou Malo, e faaititia ifo ia tausaga o, aua e le o ni faamasino foi lea e pei ia e masani ai le mamalu o le tatou Palemene. O faamasino ia e fitoitonu lava le latou matafaioi i le suesueina na o le pau lea o le latou galuega. O le mea la lea, e le tele ai ni tausaga e pei o le sao o lau saunoaga o le 8 tausaga e masani ona tuu i faamasino foi lea e i ai a tatou faamasino. Ae o le tulaga lea i le Coroner e specific lava lana ia galuega o lana matafaioi o lo o fuafua ia o le ala foi lea o le fuafua i ai faapea o le Tulafono.

FOFOGA FETALAI: Malo, faafetai.

Na faamaonia le lafo ma faitauina le Tulafono Tau Faaofi o Tagata e Suesueina Mafuaaga Lilo o Malii 2016 i lona faitauga faalua.

FOFOGA FETALAI: E tusa ai ma Tulafono Tumau, o le a tuuina atu le Tulafono Tau Faaofi o Tagata e Suesueina Mafuaaga Lilo o Malii 2016 i le Komiti tau le Va Fealoai mo le iloiloia ma toe lipoti mai i le Fono Aoa o le Fonotaga o Oketopa 2016.

**TULAFONO TAU FAAOFI O TEUTEUGA O LE TULAFONO O
FONO A NUU 2016 – faitauga faalua**

Tofa Hon FAIMALOTOA KIKA IEMAIMA STOWERS: Lau Afioga i le Fofoga Fetalai, tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o le Teuteuga o le Tulafono o Fono a Nuu 2016 i lona faitauga faalua, ia ma ou te fia tautala puupuu faamalamalama i ai.*

Faaluaina e le Minisita mo Faatoaga ma Faigafaiva ma le Minisita mo Fesootaiga, Faamatalaga o Fesootaiga Vavave Faaneionapo.

FOFOGA FETALAI: Tapa ma le faaaloalo lau Afioga i le Minisita mo lau saunoaga faamalamalama.

Tofa Hon FAIMALOTOA KIKA IEMAIMA STOWERS: Faafetai i lau Afioga i le Fofoga Fetalai. Ia e talitonu ua tauaaoina e sui usufono mamalu uma o le Maota ia le tatou Tulafono. Ia ma e o le Tulafono ua taumafai e teuteu le Tulafono o le Fono a Nuu o le 1990. Ma o le sini autu o le Tulafono Tau Faaofi, ia o le taumafai lea e faamalosi ia a tatou aganuu e mautinoa ai le tulaga mautu i totonu o Samoa, ia e ala lea i le unaia o le pitolaau o le Fono a Nuu ia ma faamautinoa ai o lo o ogatasi le faafoeina o le pule o le Fono a Nuu ia ma le Faavae. Ia e fa nai vaega o lo o taulai ai le auga o le Tulafono e aofia ai o le taumafai lea o le faamatuuina atu o se malosiaga faapitoa e faia ai ia vavao ma faasalaga i totonu o nuu.

27 IUNI 2016

**Tulafono Tau Faaofi o Teuteuga o le Tulafono o Fono a Nuu 2016
– faitauga faalua**

E le gata i lea o lo o aofia ai i le tulaga o lo o fia teuteuina i le faatupulaia o le aloaia faale-Tulafono o Fono a Nuu mo i latou o lo o alaala i fanua tau le Malo, o fanua e umia faalisi, po o fanua umia saoloto o lo o i totonu o le lotoifale o eleele o le nuu.

O le isi vaega o lo o faapena ona taumafai ai e tuuina atu i le malosiaga faapitoa o Fono a Nuu e faia ai a latou lava faiga faavae po o iugafono ma faamauina i le Matagaluega nei o Tina ma Tamaitai, Atinae o Nuu ma Afioaga ma Agafesootai ina ia mafai ai lava ona aloaia faale-Tulafono faiga faavae po o iugafono i le Faamasinoga. Peitai e le faapea o le a faamauina o faiga faavae po o iugafono a nuu o le a faapea ai ua ogatasi ma le faavae.

Ma le tulaga lona fa e pei ona o lo o auga i ai lenei Tulafono Tau Faaofi, o le manaoga ina ia faapena ona faatalatalanoa, ma maua mai le faatagaga o le fonu a le nuu a o lumanai ai e pei o le tele lava o tulaga o lo o aliali mai i lea taimi ma lea taimi i le fausiaina o ni fale, po o ni malumalu foi, e alu lava i le tulaga foi lele o le avafatafata ma le faaaloalo, e talatalanoa ai i totonu o nuu, ae o lo o i ai pea le Tulafono, a faapea e le faamalieina ai lava se tasi, ia o le aiatatau a le tagata lea e faaoo atu ai sana talosaga i le Faamasinoga o Fanua ma Suafa, pe a afai o le a le malie le finagalo, ae o lo o faafofoga mai le fonu mamalu a nuu taitasi, o tatou uma lava ua outou silafia ma matou iloa o le saogalemu lea. O le a lava le mea e avatu i luma o le fonu a le nuu, o le avafatafata lava ma le faaaloalo e faapena ona ona toafilemu ai Samoa. Ia o sina faamalamalama puupuu lea i le auga o lenei Tulafono Tau Faaofi Toe Teuteu.

Ma le faaaloalo lau Afioga i le Fofoga Fetalai.

FOFOGA FETALAI: Malo faafetai i lau Afioga i le Minisita mo Tina ma Tamaitai, Atinae o Nuu, Afioaga ma Agafesootai, ma o le avanoa foi lenei e tuuina atu i le Palemene mo nisi o sui usufono mamalu e fia saunoa e tusa ai o lenei Tulafono Tau Faaofi.

Ou te tapa ma le faaaloalo lau Afioga i le sui usufono mo le Itumalo Tu Taulaga i Sisifo.

Afioga FAUMUINA ASI PAULI WAYNE FONG: Faafetai i lau Afioga mo le avanoa ua tuuina mai i lenei aso. O le mea muamua e fia faamau ifo le faafetai tele i lau Afioga i le Minisita mo Tina ma Tamaitai ona o se avanoa foi ua ae aua lenei Tulafono Tau Faaofi.

E fia faamauina foi le lagolago a lenei itumalo i le tulaga fou ua tulai mai. Ia tatou vaai ia i luma aua le agai i luma, ina ia maua pea se sologa lelei, aua nuu o lo o nonofo i luga o fanua tumaoti, aemaise foi o i latou o lo o nonofo i luga o fanua lisi.

Na pau lea o se manatu sa fia faaoo atu i lau Afioga i le Fofoga Fetalai, e lagolagoina e lenei itumalo aemaise foi lenei sui usufono le Tulafono Tau Faaofi ua faatulai mai.

Ma le faaaloalo lava, faafetai.

27 IUNI 2016

**Tulafono Tau Faaofi o Teuteuga o le Tulafono o Fono a Nuu 2016
– faitauga faalua**

FOFOGA FETALAI: Malo faafetai. Tulai mai le sui usufono mo Falealupo.

Afioga Hon AEAU PENIAMINA LEAVASEETA: Lau Afioga i le Fofoga Fetalai ma le mamalu o le Palemene, ou te tulai atu e fia faaalua le agaga faafetai i le Afioga i le Minisita e a ia le Tulafono Tau Faaofi, aemaise lava le aumaiga o le Tulafono Tau Faaofi lenei, aua ou te talitonu i afioaga i tua, e pei o lo o faatuatuaina lava le faatofalaiga a fonu a nuu. Ia manatua foi la fonu a nuu, e i ai vaega foi nei e tou te silafia lava tatou te iloa uma. Ae a limataitaiina i se Tulafono e taitaiina ai le faatofalaiga, e ese le manaia, o lea la ua aumai. O le agaga faafetai lena ona e aafia ai le soifuaga toafimalie o afioaga ma alaafaga pe a limataitaiina i se Faavae po o se alafua. O lea la ua aumai, o le matua manaia lava.

O le agaga faafetai lea i le faatofalaiga leaga e tele afioaga ma alaafaga, tulou lava lava le gagana, e tau alu le tapasa i le isi taimi pe a faapea e... Ae o le aumai o se alafua e limataitaiina ai fuafuaga aemaise foi o le nofo lelei o itumalo, o le agaga faafetai lea ou te lagona e taua tele i so o se afioaga o le tatou atunuu nei. E fai lava foi o le finagalo o faipule, i mean o tama o se itumalo, e i ai lava le taimi e sasi ai, ae ese le manaia o se alafua e faataatia e le Malo i lau Afioga i le Palemia ma lena Itu. Faafetai o lea ua faataatia, ou te talitonu o le a sologa lelei ma taitaiina lelei le faagaioiga o le pulega a afioaga i nuu i tua.

O le agaga faafetai lea lau Afioga, faafetai.

FOFOGA FETALAI: Faafetai. Tulai mai lau Afioga i le Minisita mo Galuega, Felauaiga ma Atinae Eseeese.

Susuga Hon PAPALITELE NIKO LEE HANG: Faafetai i lau Afioga i le Fofoga Fetalai mo le avanoa.

E muamua ona avatu le faamalo ma le faafetai i le Afioga i le Minisita mo lenei Tulafono Tau Faaofi taua. Ae i ai lava le mataupu lea sa ou laga i le taimi sa faatalanoa ai lenei Tulafono, i le fuafuaga lea i le Vaega 12. I le maitau atu i le Tulafono Tau Faaofi i le mea lea o le fausiaina o maota ma laoa, e leai se faaupuga a mea e oo atu se tapenaga a le Matagaluega o Galuega mo se pemita ua atoatoa ma lelei le structure ma mea faapena. A o lea e fai mai le Tulafono Tau Faaofi e tuuina atu i le Village Fonu, approve le structure ona faataga loa lea o le fausiaina o maota ma laoa. Ae pei o se puipuga lau Afioga e tapuina se faalavelave ne i meaane ua supercede e lenei Tulafono Tau Faaofi isi Tulafono.

Ma lou faaaloalo lava.

FOFOGA FETALAI: Malo faafetai, tulai mai le sui usufono mo Faleata Sisifo.

27 IUNI 2016

**Tulafono Tau Faaofi o Teuteuga o le Tulafono o Fono a Nuu 2016
– faitauga faalua**

Tofa LEALAILEPULE RIMONI AIAFI: Faafetai lava mo le avanoa, faafetai foi i le Afioga i le Minisita mo le Tulafono Tau Faaofi. O le Tulafono Tau Faaofi leni ua loa tausaga o taumafai tatou e fesuisui ai ina ia i ai se amanaia ona e pei ua leva ona faataatia mai le Tulafono Tau Faaofi, ae pa puipuia lava e tusa ai o le Faavae ma tulaga faapena. Aua o le tusiga lava ia o Tulafono a Samoa, e le mafai ona alofia pe a tatou tusia Tulafono, ua ogatasi ma talitonuga faale-Ekalesia o i ai tatou, aemaise foi o le tatou aganuu, e tataua lava ona amanaia e Tulafono nei. Talu ai la ona o lou itumalo ua toatele foi le mamalu o le atunuu ua afifio mai ma papaaao ai, ia, e taua ai tele le Tulafono Tau Faaofi leni, ina ia i ai le vafealoaloai mo i latou o lo o afifio mai aemaise foi afioaga mavae o lo o i totonu o le itumalo. I le taimi leni, o tatou ia o Samoa e malamalama po o fea lava e te alu i ai, e te alu atu lava e mulimulitaia i tulafono ma faiga faavae po o tu ma se aga a lea afioaga ua e nofo ai ma aumai ai. O le tele foi lena o le tatou atunuu o aumau i totonu o lea itumalo. Afai foi la e i ai ni tulaga e tulai mai, o le tele lava o aiga e valaau mai, ou te oo lava i ai e fofo e tusa ai ma aganuu ma tu ma le masani, e tele ina amanaia e nai aiga nei ma le toatele o i latou nei.

Na pau le vaega lea i le suiga o le Vaega 8(5) o le Tulafono Tau Faaofi lea e faapea mai, afai ae le amanaia e se isi e nofo ese mai ma fanua faaleaganuu se iugafono a le nuu po ua le ogatasi ana tu ma ana amioga e tusa ai ma faiga faavae a nuu, e i ai le malosiaga o alii ma faipule e aami ai lea tagata. A faapea la e le oo atu le tagata, o lea la ua faapea mai le Tulafono Tau Faaofi, e mafai ona faasala, e faasala i se tupe e le sili atu ma le lima iunite. O lou la talitonuga, o lau la fesili i lau Afioga i le Tamaitai Minisita, o le a tonu la le malosiaga lea i totonu o le nuu e faasala ai se tagata faapea pe a le oo atu i totonu o fono ia a nuu, aua i lou talitonuga, o i e tataua ona galulue ai loa le pulega a alii ma faipule ma leoleo aua o lo o... i le mea lava lea tau le puipuia o le aiatatau faale tagata latou. O tatou o le agaga o tatou ia nonofo filemu ma nonofo faatasi ma feoeoeai faatasi tagata ua mafai ona nonofo faatasi i totonu o afioaga mavae nei. I lea foi taimi, tatou te faaeteete foi ina ne i te i ua faaoga sese, abuse le malosiaga. O le mea la lena o lea e fia malamalama ai i le vaega lea, po o le a tonu le malosiaga o i ai, ae pe mafai foi i lalo o le Tulafono Tau Faaofi ona faasala e tatou tagata nei pe a le oo mai i totonu o nuu a o le a foi le malosiaga e aumai faamalosi ai i latou nei.

O le isi mea lau Afioga, o pulega ia i fale aua e i ai fale ia ua fai i lou itumalo, a e alu atu e te tagai i ai lau Afioga, afai e eka le fanua, e kuata eka foi le tele o le fale, e oo ai lava i le tuaoi, te i ua oo i luma o le auala. Ia, o le a la le malosiaga o alii ma faipule e o i tagata nei pe a faapea o se fanua tumaoti lea o lo o tu i ogatotonu o se nuu po o totonu o faiganuu. Aua o le mea, e pei e fuafua mai e fai i le vafealoaloai ma tulaga faapena.

E le gata i lea, e tataua foi la ona i ai se malosiaga o nai tagata nei aua o le mea lea e tupu i maluu ia e tupu i uta i i, e tele ina valaau atu nisi aiga ona ou sau lea i ai, e le omai e fesoasoani i le taimi e moomia ai le fesoasoani, ae a fai o latou maluu te i lava ua omai, ia o le mea masani foi lele a tatou, o eleele nei o Faleata, aumai se....

27 IUNI 2016

**Tulafono Tau Faaofi o Teuteuga o le Tulafono o Fono a Nuu 2016
– faitauga faalua**

O ituaiga mea faapena. E le lelei foi lenei mea. E tatau foi la ona vaavaai i ai i tulaga faapena, ina ia puipuia nei mea ma le tulai mai o tulaga faapena. A o le Tulafono lava ia i le intension ma le aotelega o le Tulafono Tau Faaofi e lagolagoina e lou sui usufono, aemaise foi la le nofo ai i totonu o itumalo nei, a o le mea lava lenei ia paleni tulaga e i ai i lo tatou naunau atu ma le tulaga e i ai. Aua tatou te auai tele i le Tulafono Tau Faaofi, e tatau ona faaaloologia ma aloaia i tulafono a nuu mavae, ma e ia tatou foi le faamalumalu i tulaga faapena i le tatou va nonofo ai.

O le isi lava mea lau Afioga aua o lea fai mai e fai kopi e fa kopi, kopi a le Ofisa o le Fono, kopi a... A o le a le mea e le avatu ai ia outou ona fai lea o tou kopi tufa i le Ofisa o le Fono, Ofisa o le Loia Sili... Aua o le aganuu lenei a Samoa ua tatou masani ai, e tuutaliga tuugutu, a o lea e pei ua finagalo le Matagaluega e faamaumau mea uma ona ave lea o kopi i Matagaluega ia taitasi ae tatau foi ona i ai se faiga e.... Ma le faaaloalo lava, faafetai.

FOFOGA FETALAI: Malo faafetai, manaia le finagalo faufautua ma lagalaga i mea lelei. Ia, masalo toe tasi le sui usufono toe o le sui usufono mo Falealili ona see atu foi lea i le Minisita.

Afioga FUIMAONO TEO SAMUELU TEO: Lau Afioga i le Fofoga Fetalai, e fia faamauiina le agaga faafetai i le Afioga i le Tamaitai Minisita mo le Tulafono Tau Faaofi ua maea ma matagofie lona aumaiga.

Ae na o le lua lava nai vaega e avatu ai se fautuaga a lenei itumalo, o le Fuaiupu 8 i le suia lea o le Fuaiupu 9 o le Tulafono Tau Faaofi ina ia faapea ona oo atu le pule. O le upu lea pule mamalu a alii ma faipule ia i latou o lo o nofoia tulaga foi nei o fanua umia saoloto, pe mafai ona i ai se isi faaupuga, ina ia usitaia ma lagolagoina e i latou o lo o nofoia fanua umia saoloto pulega a alii ma faipule. Mo se faataitaiga afai o la e i ai le vavao, e usitaia e i latou nei le vavao. O a tulafono i totonu o nuu, e usitaia, a ia aveese le upu lea o le pule, aua e ono aafia ai tagata nei e nonofo i fanua umia saoloto i mea foi nei o faigamea a le nuu, ona pei lea ua taaina atu ai ma latou i le pule mamalu lea a alii ma faipule.

O le lona lua o fautuaga i le vaega lea o fale, ona o lea e general mai le aumaiga o le Tulafono Tau Faaofi, e i alii ma faipule le pule e fausia ai se maota po o se fale tapuai po o se faleoloa mo le faataitaiga. Pe le mafai ona aveese le lautele o fale, ae specific lava le Tulafono mo i latou po o aiga o lo o fia faatuina ni pisinisi i totonu o alaafaga ma nuu, po o ni malumalu tapuai. Na pau ia o mea e lua o lea e tau ave i ai le faamamafa a nuu, ou te iloa foi o lenei lea e luga lalo ai mataupu a nuu ma afioaga, o pisinisi ma Ekalesia. A o le lautele ia o le fauga o fale, aua leaga o la e i lalo o le Matagaluega o Galuega, o lona uiga, e saoloto lava le aiga ia a fia fau lava lo latou fale ona ua meet o criterias uma e tatau ona fau ai le fale mai le Matagaluega, ona fausia lea o le latou fale.

27 IUNI 2016

**Tulafono Tau Faaofi o Teuteuga o le Tulafono o Fono a Nuu 2016
– faitauga faalua**

Na pau lea o nai vaega e tau soso atu ai i le Afioga i le Tamaitai Minisita. Faafetai mo le Tulafono Tau Faaofi. Faafetai i lau Afioga i le Fofoga Fetalai.

FOFOGA FETALAI: Malo faafetai. Ou te tapa lau Afioga i le... Ia, malie le Minisita toe toatasi lava le sui usufono, toe o le sui usufono mo Sagaga le Usoga.

Susuga SEIULI UELIGITONE SEIULI (Sagaga le Usoga): Faafetai atu i lau Afioga i le Fofoga Fetalai. Ou te fia fesoasoani atu i le mataupu lea pei ona saunoa i ai nisi i mea tau fale ma le fausaga o fale i totonu o nuu, ina ia ogatasi le Tulafono Tau Faaofi lea o Fono a Nuu ma le Tulafono lea na saunoa atu ai le Minisita mo Galuega, Felauaiga ma Atinae Eseeese. E fia faamanatu foi i le Afioga i le Minisita e ona le Tulafono lea, ina ia silasila ifo, o lea e i ai foi le Tulafono a le PUMA latou ia mo le fausiaina o fale, o le a le ituaiga fale e fia fausia i totonu o se nuu, e tapa foi le consent mai le PUMA faamolemole.

Faafetai i lau Afioga i le Fofoga Fetalai.

FOFOGA FETALAI: Malo faafetai, se i tagai ifo pe le i valu ni pule pe fia ni pule i noanoatia foi le atunuu.

Tulai mai lau Afioga i le Tamaitai Minisita.

Tofa Hon FAIMALOTOA KIKA IEMAIMA STOWERS: Lau Afioga i le Fofoga Fetalai, faafetai ou te iloa o le toatele o sausaunoaga a sui usufono mamalu sa tutulai mai o le faafetai mai e tusa ma lenei Tulafono Tau Faaofi se i vagana ai le tulai mai o le Afioga i le Minisita mo Galuega. E faapena foi le finagalo o le sui usufono o lea faatoa faamaui atu nei. E pei o lea e atagia mai o le tulaga o fale ia e talitonu o lo o i ai lava le Tulafono latou ia e apply, ia fai le pemitā, fai pasifale ma mea uma o lo o tumau. O le mea lea o lo o taua i le Tulafono Tau Faaofi, o le puipuiga. O le faataitaiga, faapea o au ua ou fia alu atu i Savaii e fai sau pisinisi ona o la e umia saoloto lou fasi fanua la e i Savaii. Afai la o au o se tagata e i ai se malamalama, o lou fanua la e i totonu o eleele o nuu ma itumalo. E masani foi tatou i upu e faalogoina soo, o le ala maualalo lava e maua ai le toafilemu, o le sailimalo e alu i lalo. E tatau ona ou tulai ou te alu ou te talatalanoa ma faafesootai le pulega mamalu a alii ma faipule, aua a ou le alu i i, a tauai lava lou fale e tamaiti o le nuu ma tupulaga ma aumaga ae e le o i ai se faamalumaluga a alii ma faipule, e pei o nai faataitaiga na ou te talitonu ua silafia uma lava e tatou mea o lo o tutupu i o tatou nuu ma afioaga.

O le upu lea o le faaaogaina o le pule, e leai e le o avefaapea o le a pule alii ma faipule i le tulaga e pei ona sausaunoa i ai sui usufono mamalu. Na outou soifua mai lava ma o tatou feola mai, o upu lava a toeaiina e mamalu lava le pule alii ma faipule.

27 IUNI 2016

**Tulafono Tau Faaofi o Teuteuga o le Tulafono o Fono a Nuu 2016
– faitauga faalua**

E le o se mea la tatou te popole ai i la lea tulaga, ua o se faamalumaluga, o se puipuiga, i saunoaga uma lava ua faapena ona tulai mai, e tasi lava le auga, o le avafatafata, o le faaaloalo ma le alu i lalo, le va tapuia e maua ai le toafilemu o nuu ma afioaga, i le faamalumaluga lea a le pule mamalu a alii ma faipule.

O le tulaga lena e momoli atu ai le faafetai i lau Afioga i le Fofoga Fetalai, e tusa ai foi o faafesili sa faatulai mai. Ma le agaga faaaloalo.

FOFOGA FETALAI: Malo faafetai. Se i toe tuu atu le avanoa i le sui usufono mo Faleata Sisifo pe i ai se isi mea lau Afioga i le sui usufono?

Tofa Lealailepule Rimoni Aiafi: Lau Afioga i le Tamaitai Minisita, e leai e tasi lava lea mea lea e te toe tagai i ai. O le Vaega 5, ou te talitonu, a faapea ua le usitaia e le tagata lea le feau a le nuu, e tataua ona molia e le nuu, e molia e le nuu I le Faamasinoga po o Fanua ma Suafa po o tai foi i fanua o le Malo, o i ina la e maua mai ai le faaiuga. Aua o lea e faapea mai, a le sau le tagata, ona outou faasalaina lea i le nuu o le tagata lea. E pei la o le mea lena e toe tagai i ai lau Afioga i le vaega lena.

Ma le faaaloalo lava.

FOFOGA FETALAI: Malo faafetai. Se i toe tulai mai lau Afioga i le Tamaitai Minisita pe ua maua se tali o lea mea.

Tofa Hon FAIMALOTOA KIKA IEMAIMA STOWERS: Faafetai atu i lau Afioga i le Fofoga Fetalai, ou te talitonu foi o le sui usufono e tele le tomai ma le silafia i auala eseese e foia soo se faafitauli. Ae eseese foi lava faiganuu, e pule lava nuu ia, i a latou Tulafono o le a fatufatu. E pei lava ona ou faitau, a faapea lava e utagia ma aloaia, a leai, o lo o i ai Tulafono e ave ai le tagi i le Tulafono mo nisi tulaga o le a tulai mai. Afai e le malie ai le sui usufono mamalu, ou te talitonu e tele au idea ma metotia e fai i i le tou itu lea, e foia ai faafitauli o si outou lotoifale, e tai pei foi o i matou ma o matou lotoifale.

Ma le agaga faaaloalo.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fono a Nuu 2016 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o le vaega tau le Va Fealoai mo le iloiloina ma toe lipoti mai i le Fono Aoao i lana Fonotaga o Oketopa 2016.

27 IUNI 2016

TULAFONO TAU FAAOFI O TEUTEUGA O LE TULAFONO O LE GAUMATIVA 2016 ó faitauga faalua

Afioga Hon FAAOLESA KATOPAU T. AINUU: Lau Afioga i le Fofoga Fetalai ou te faatu le lafo, *Ina ia faitauina Tulafono Tau Faaofi o Teuteuga o le Tulafono o le Gaumativa 2016 i lona faitauga faalua, ou te fia tautala faamalamalama i ai.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai, Minisita mo Aoga, Taaloga ma Aganuu ma le Minisita mo Faatoaga ma Faigafaiva.

Afioga Hon FAAOLESA KATOPAU T. AINUU: Lau Afioga i le Fofoga Fetalai o le sini autu o le Tulafono Tau Faaofi lenei, o le Teuteuga o le Tulafono o le Gaumativa 1908. O le Teuteuga lea e tau faaofi, o le faasaina lea o se tagata ua uma ona faamasinoina ma faailoa aloaia le gaumativa mai le tuua o Samoa e aunoa ma se faatagaga a le tagata aloaia ua faaliliu atu i ai, pe a faa-Peretaniaina le suiga lea, o le ó the Bill is to prohibit adjudicated bankrupts from leaving Samoa without the Official Assignee's approval, o mo le faigofie ona malamalama o sui usufono lau Afioga.

Ma le faaloalo lava.

FOFOGA FETALAI: Ia, se i tulai mai le Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA DR. SAILELE MALIELEGAOI: Lau Afioga i le Fofoga Fetalai, o le Tulafono Tau Faaofi tonu lea e agai tonu lava i mea tau pisinisi masani, ua le mafai e tagata o lea sa nofo aitalafu i isi tagata ona totogi. Ia, ona talosaga loa lea i le Faamasinoga o ia ua matua gauaano, gauivi, ua matua gau lava ua le mafai ona toe totogia se aitalafu. O le uiga tonu lena o le Tulafono Tau Faaofi lenei.

O le uiga la o le amiotonu o le Tulafono Tau Faaofi, ona tofia ai lea o le tagata lea e taua o le Official Assignee, o lana galuega e fai o le alu atu e tapa uma lava meatotino a le tagaa lea ua gau ana pisinisi, ona fai lea i ai o se galuega e aumai uma faatau ona tau togitogi ai lea o aitalafu a i latou ia e tau togitogi ai le pisinisi ua gau. A alu alu loa la afai e \$30,000 lea e nofo aitalafu ai le tagata lea i le isi tagata, e uma ane pe na o le 2sene i le \$1, ona faapena ai lea. O le ala lea o aiaiga ia o le Tulafono Tau Faaofi, ia taofi lava iinei i Samoa, aua ne i alu i fafo, i te i ua alu atu sola, ae matua taofi lava iinei se i maea lelei lava ona faataape ana meatotino ma totogi le tagata, ma sutesue foi pe le o faalafi ni ana tupe i se isi mea i te i ua tuu atu e alu i fafo ma alu atu lava ma alu atu ai. O le suega lena o le amiotonu lea e mafua ai le mea lea ne i te i foi ua faapea ane se isi o le l alofa o le Tulafono Tau Faaofi. E ala ona puipuia mea nei, o le puipuiga o tagata o lea ua tele a latou tupe e nofo aitalafu ai le tagata ua gau ona o ana faiga pisinisi.

27 IUNI 2016

**Tulafono Tau Faaofi o Teuteuga o le Tulafono o le Gaumativa 2016
ó faitauga faalua**

O isi lava la gau, e gau moni lava, pau lava ua gau, a o isi gau, e gau pepelo, i le tulaga foi lele e nofo ma ave ana aseta e nana i se isi mea i fafo, ma le faamoemoe e oo i se taimi mulimuli ona sola lea i fafo ma le toalua ma le fanau o olaola lelei ai i tupe a tagata nei na nofo aitalafu ai.

Lau Afioga i le Fofoga Fetalai, o le mafuaaga lena o le malosi o le Tulafono Tau Faaofi lea, ia matua taofi ai lava le tagata lea ua gaugau ai isi, se i matua faamaape pe o se gau moni po o se gau pepelo.

Lau Afioga i le Fofoga Fetalai, o le faamalamalama atili lena o le Tulafono Tau Faaofi lena.

FOFOGA FETALAI: Malo faafetai. Ia ma o le avanoa foi lena pe afai e i ai se sui usufono e fia saunoa, ae afai e leai, o le a tuuina atu le fesili aua o lea ua manino ma malamalama le saunoaga a le Afioga i le Palemia.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Gaumativa 2016 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le iloilo ma toe lipoti mai i le Fono Aoa o lana Fonotaga o Oketopa 2016.

**TULAFONO TAU FAAOFI O LE KAMUPANI A LE LANDING 2016
- faitauga faalua**

FOFOGA FETALAI: Ua i ai le manatu ua tataua ona iloilo le Tulafono Tau Faaofi o le Kamupani a le Landing 2016 i le tulaga faanatinati. E taua tele lena Tulafono Tau Faaofi i le tamaoaiga o Samoa, ua ou faaogaina ai nei le malosiaga o le Fofoga Fetalai i lalo o le Tulafono Tumau 102(2) e faagasolo ai faanatinati le Tulafono Tau Faaofi lena.

Ou te tapa lau Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT: Faafetai lava i lau Afioga i le Fofoga Fetalai. Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Kamupani a le Landing 2016 i lona faitauga faalua ma ou te fia tautala faamalamalama i ai.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai ma le Minisita mo Faatoaga ma Faigafaiva.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai. O le Tulafono Tau Faaofi lena e le o po se lilo i le Kamupani lea a le Survivor Australian o lo o pueina le ata tifaga i lafanua o le tatou atunuu.

27 IUNI 2016

**Tulafono Tau Faaofi o le Kamupani a le Landing 2016
- faitauga faalua**

O le Tulafono Tau Faaofi la lenei e faatatau mo le lafoga rebate, toe faafoi o tupe o lo o latou faaaogaina i totonu o le tatou atunuu. O le fuafuaga a le Kamupani e faapea po o se mea o le \$17miliona i le \$19miliona latou te faaaogaina mo le pueina o le ata lenei, a o lea la e fua i ai le rebate lea e \$5.7miliona le tupe e toe faafoi a le Kamupani lenei. O le tuutuuga lenei ona sa fai tuutuuga a le Kamupani lenei ma le tatou Malo, sa tauva i ai tatou, o Toga ma Fiti. E tele atu le rebate na ofo e Fiti i le Kamupani lenei e 45% e toe faafoi ae ona o le vave o le faagaoioiga o le tatou polokalameina o le Kamupani na ala ai ona omai i Samoa nei. I le ma le isi mea, o le saogalemu aemaise o le faatinoina o galuega o lo o moomia e le kamupani lea i le pueina o le ata tifaga lea. O lea ua fuafua e ova atu ma le \$20miliona le aofai o le tupe e faaalu under estimate e le Kamupani, ona o lea e tai lua vaiaso ma audit, ma aumai i totonu faamaumauga i le Ofisa o Tupe Maua, ina ia mafai ai ona continue le suega o latou expenses mai lea taimi i lea taimi. Ma a uma le puega o le ata lea ua faaali lona Vaega 1, e fitu aso ona totogi atu lea o le repaid lea. Pe tele lava i luga le latou tupe faaalu, e gata lava le tupe i le \$5.7miliona e toe faafoi atu, a o le tupe atoa lava o lo o faaaogaina aua le tamaoaiga o le atunuu. E manuia ai faletalimalo, o taavale rentals, o tagata faigaluega o lo o galulue i tua i le kamupani lenei, ona o le kamupani foi lenei o lo o faafaigaluegaina o tatou tagata. Atonu e uma atu le ata lea ua mafai foi ona ave nisi e pei o le American Survivor o lo o faigaluega ai lava nisi sa galulue iinei.

O le isi itu o le Tulafono Tau Faaofi lenei, o tagata faigaluega uma lava e omai mai fafo e tuusaunua i a latou lafoga, ona o latou mai fafo vagana tagata faigaluega o lo o i totonu o le atunuu e totogi a latou lafoga i totonu o le Matagaluega o Lafoga lau Afioga. E pei o le naunautaiga lava lena o le Malo ina ia mafai ona tuu atu le manuia lautele mo le tatou atunuu, fua i lenei tupe tele o lo o faaalu atu e \$20miliona o lo o pue ai le ata lenei i totonu o le tatou atunuu, ae na o le \$5.7miliona e toe faafoi.

O le faamalamalamaga lea lau Afioga, ae pei sa tele foi le faamalamalamaga i le tatou workshop sa fai i fale, faafetai lau Afioga.

FOFOGA FETALAI: Malo faafetai. Ua ou manatu ua tele le aoga o a tatou semina ma faamalamalamaga i a tatou Tulafono Tau Faaofi nei ua malamalama lelei ai finagalo o sui usufono mamalu. E momoli atu ai le agaga faamalo ma le agaga faafetai, ae vagana ona e i ai se isi sui usufono e le i malamalama i le tatou workshop ma le tatou semina ona tulai mai lea e saunua. Ae afai e leai, o le a tuuina atu loa le fesili.

Na faamaonia le lafo ma faitauina le Tulafono Tau Faaofi a le Landing 2016 i lona faitauga faalua.

27 IUNI 2016

**TULAFONO TAU FAAOFI O LE KAMUPANI A LE LANDING 2016
- iloiloga auiliili**

FOFOGA FETALAI: E tusa ai ma Tulafono Tumau 102, e amata le iloiloga auiliili i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: O le Tulafono e noatia ai le Malo.

Faamaonia.

FUAIUPU 4: Tinoitupe toe faafoi.

Faamaonia.

FUAIUPU 5: Tuusaunoaga o lafoga o tupe maua.

Faamaonia.

FUAIUPU 6: Tuusaunoaga o totogifuapauina mo galuega ma pemitā malaga.

Faamaonia.

FUAIUPU 7: Tuusaunoaga i oloa faaulufale mai.

Faamaonia.

FUAIUPU 8: Faatapulaaaina o le faatauina atu po o le aveina atu faameaalofa o oloa faaulufale mai.

Faamaonia.

27 IUNI 2016

**Tulafono Tau Faaofi o le Kamupani a le Landing 2016
- iloiloga auiliili**

FUAIUPU 9: Lipoti ma faamatalaga tau tupe.

Faamaonia.

FUAIUPU 10: Teuteuga faatupulaia.

Faamaonia.

FUAIUPU 11: Mutaaga o le Tulafono.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o le Kamupani a le Landing 2016.

Faamaonia.

Na faagasolo le Tulafono Tau Faaofi o le Kamupani a le Landing 2016 e aunoa ma se Teuteuga.

**TULAFONO TAU FAAOFI O LE KAMUPANI A LE LANDING 2016
- faitauga faatolu**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Kamupani a le Landing 2016 i lona faitauga faatolu.*

Faaluaina e le Minisita mo Aoga, Taaloga ma Aganuu, Minisita o Tupe, Minisita mo Tina ma Tamaitai, Atinae o Nu'u, Afioga ma Agafesootai ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

27 IUNI 2016

Lafo mo le Faaauauina o Itula Fono

FOFOGA FETALAI: Ia, o lea ua tatou toai taunuu i le siui o le tatou galuega, ma se i tapa lau Afioga i le Palemia mo sou finagalo.

LAFO MO LE FAAAUAUINA O ITULA FONO

Susuga Hon TUILAEPA AUELUA FATIALOFA LUPESOLIAI LOLOFIELE NEIOTI AIONO GALUMALEMANA DR. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faaauau itula Fono o le aso seia maea uma galuega ua faatulagaina. Toe tasi lava si tamai mea lea, a maea ona tatou manava ai lea ma faamuta ai foi ma le tatou Fono o lenei foi Tauaofiaga.*

O le lafo lena lau Afioga i le Fofoga Fetalai.

Faaluaina e le Minisita mo Tupe Maua, Minisita mo Faatoaga ma Faigafaiva ma le Sui Palemia.

Na faamaonia le lafo.

FOFOGA FETALAI: Tulai mai lau Afioga i le Palemia.

SAUNOAGA FAA-MINISITA MA LE LAFO MO LE TOFIA O LE KOMITI SUESUE

Lau Afioga i le Fofoga Fetalai, ma le paia o lenei Maota, faapea Samoa faafofoga tapuai mai ó o lea ua pasia e le Maota le Tala Faatatau Autu o le Tupe 2016/2017, sa fit ituga ai Sui Usufono mamalu o lenei Maota, aemaise o le Komiti o Tupe Maua ma Tupe Totogi. Faapea foi nisi o Tulafono na faanatinati ona o ni mafuaaga tatau, ma le tele lea ua faasee atu mo iloiloga a Komiti.

Ae, e i ai se mataupu t ua tele, ou te fia talanoa i ai, e mafua ai ona ou tap le avanoa lenei mo Saunoaga Faa-Minisita i lalo o tatou Tulafono Tumau, e faavae ai le Lafo o le a faatuina mulimuli.

Ua silafia e Sui mamalu o lenei Maota le mataupu sa ou lag i le Tatalaina o le Semina Faamasani a Sui Usufono, i le aso 15 Mati 2016, ma afea foi e lau Folasaga 1 (*Faataatiaga o le Faiga-Malo o Samoa*) i le Fonotaga -Symposiumø mo Sui Usufono o le Palemene Lona XVI i le aso 29 Mati 2016. O nei tautalaga, o loo maua le toaga i le tatou nusipepa o le ðPalemeneö, e mafai ona toe silasila ane i ai, e faamanatu ma faapupula atili.

Ae, ole mataupu na tautalaga ó *“Galuega Mata’itu a Ituafe-faatauagai e 3 o Faiga-Malo”*. E mataitu ai e le Pulega Faatonu le Palemene ma le Faamasinoga, e mataitu foi e le Faamasinoga le Pulega Faatonu ma le Palemene, e faapen foi ona mataitu e le Palemene le Pulega Faatonu ma le Faamasinoga.

27 IUNI 2016

Saunoaga Faa-Minisita ma le Lafo mo le Tofia o le Komiti Suesue

Peitai, e ao ina silafia lelei e lenei Maota ma Samoa faafofoga mai, o lenei galuega mataʻitu e siaki ai e le isi Itutino le isi Itutino, e lona se faatinoga na faia e se Vaega Faaupufai, poo se Malo na tulaʻi mai. O lenei galuega mataʻitu, o se aiaiga o a tatou taima aga o faiga-Malo faa-temokarasi, na filifilia e matua ma tua e limataitaiina ai ma tomatauina ai a tatou faiga-Malo, ina ua tutoatasi Samoa i le 1962.

O lona uiga, e le o se loto o se toatasi pe toaitiiti, ae o le aiaiga e mataʻitu, o se aiaiga na laualuga i le Fono Faavae ma o loo lotolotoi i lo tatou Faavae, o le Tulafono aupito i maualuga a le Malo o Samoa, o a ni Tulafono e feteenaʻi ma le Faavae ó e soloia ma taʻu aogaina.

✱ Faafitauli

Lau afioga i le Fofoga Fetalai, e pei ona silafia i folasaga na ou taʻua na faia a Sui Usufono ia Mati 2016, le anoanoaʻi o le atunuu e sulufaʻi atu ia te aʻu mo se fesoasoani, ona o a latou mataupu i le Faamasinoga.

Peitai, e noanoatia laulu o Taemanutavaʻe, ona o le va-vavae o le Faamasinoga ma le Pulega Faatonu, ua lafo ai le faatuatuaga i le Faamasino Sili ma le Vasega o Faamasino i le latou pitolaau, ae faapea foi Aʻu nei ma le Kapeneta i le faafoeina o le Pulega Faatonu.

E itiiti lava mataupu e tuʻuina ai le Faamasinoga o Soligatulafono e pei ona tagofia e le Faamasinoga Faa-Itumalo ma le Faamasinoga Maualuga. Ae o le 99.99% o mataupu e sulufaʻi, ma faailoa atu ai le faagaul malie o le atunuu, e mafua ona o faaiuga ma taualumaga faaumiumi a le Faamasinoga o Fanua ma Suafa.

O le mea moni lau afioga i le Fofoga Fetalai ma lenei Maota, poo fea lava tatou te taumafai i ai, ia 100% mea uma, ma tagata latou te faia, e lona mafai ona 100% au e ola faatasi lava le tit nia ma le saito. O le olaga agasala ina ua toʻalalo le uluaʻi tagata, lea na liutino tagata ai lo tatou Atua ina ia mafai ona toe sosoo le mafutaga motusia a le tagata ma lona Atua, ma tatou saofag i le Faaolataga. Ae, e ui a ole meaalofa foaʻi fua mai, ae i ai foi le tatou galuega e fai ina ia mafai ona o tatou maua. E oo foi a i lenei Maota, e ui a e toatele i Sui Usufono lelei, ae i ai foi a ma Sui Usufono faapalapala i o latou tiute faa-Sui Usufono o le Palemene.

O le lona faia lelei ma le atoatoa o tiute o soo se tagata i lona valaauina, o le lona faia lea ma le lona tali faaaloalo i lona e ana le valaau. Afai tatou te talitonu i Afioaga a lo tatou Atua, o tofiga uma e mai luga, ae tatou te lona faamaoni i tiute o Lana valaau, o le uiga lona lona tala. Ona tatou nainai lea o tofiga, ae aumai le valaau a lona e ana tofiga, ae tatou te lona tali atu ma le faamaoni.

Lau Afioaga i le Fofoga Fetalai ma lenei Maota, o le faapupulaga lona lona mataupu lea ou te taumafai atu ai. O nisi o Faamasino o le Faamasinoga o Fanua ma Suafa, ua avea le tofi ma avanoa e eva ai, ona o le tofiga e tuutalalo seʻia aulia le 70 tausaga, ae leai ni laasaga e toe siaki ai poo faatino ma le faamaoni o latou tiute na tofia ai. O se tulaga e tatau ona toe silasila lelei i ai, i latou o taʻuulu i le galuega faa-Faamasinoga.

27 IUNI 2016

Saunoaga Faa-Minisita ma le Lafo mo le Tofia o le Komiti Suesue

Ou te l tau fai atu, soo se galuega e tatau ona i ai ni vasaga ma laasaga e siaki ai ma saga siaki poo faatino matafaioi ma ausia manaoga ma faamoemoega na mafua ai ona fai. E pei foi o le faiga o loo fai nei i Faauluuluga o Matagaluega ma Faalapotopotoga a le Malo. E tig lava ona lelei faatino se galuega a se Faauluuluga, a maea loa le 3 tausaga o konekarate e toe faasalalau lava le avanoa, e toe saili pe i ai se isi e sili atu i loo le Faauluuluga o loo i ai. O le uiga o lea faiga, e sili ona taua le galuega ma lona taunuuga i loo le tagata, aemaise mo si o tatou atunuu e tau faasoosoa seleni. O ai lava e sili atu ona agavaa, ma lava le silafia ma le malosi e faatino ai se galuega, o ia lava lona e tatau ona tofia.

E l faia i se alofa, au o tupe faitele a le atunuu, ae o measina foi a sulii ma aiga, e tatau lava ona tofia i ai ni tagata sili ona agavaa, e l fefefe ae lototetele ma faamaoni e faia ma le tonu faaiuga. Au o le tulaga e sili ona matautia i faaiuga a le Faamasinoga o Fanua ma Suafa ó (*judgement in rem*) e aafia ai i tatou o loo soifua nei, ae faapen foi fanau lalovaoa ma tupulaga e lea soifua mai. O lo tatou faapalapala, faatamala ma faatautala i nei ona aso, ae aafia ai tupulaga e lei soifua mai o Samoa.

O lea foi e tupu ia i tatou Sui Usufono uma o lenei Maota, a uma lea 5 tausaga ua tatou toe foi i o tatou Itumalo ma tagatanuu na filifilia i tatou, e toe filifili poo ai e avea ma o latou sui mai lea paeaiga i lea paeaiga. O loo tatou maitauina foi e le itiiti lava i le 50% Sui Usufono fou e pale mai i lea paeaiga ma lea paeaiga. Au e fua lava lo tatou toe foa mai ile silasila ma le faamasinoga a tagatanuu i le faatinoina o tatou tiute, au o le pule a tagatanuu lea tatou te faatinoa. O le Faiga Palota Lautele, o le vasaga lona e siaki ai i tatou.

O le faamoemoe foi lona o lenei tautalaga ó ia i ai se vasaga e siaki ai le galuega a Faamasino o le Faamasinoga o Fanua ma Suafa. Afai, e l faia e le Faamasinoga i lo latou lotoifale, o loo i ai le tiute o le Palemene e faatonuina ai le faia. O lona tiute, e atagia i le avanoa e pasia ai e lenei Maota se Lafo, e fulisia i ai le 2/3 o finagalo o Sui Usufono o lenei Maota, e tuuina atu ai se talosaga i Le Ao o le Malo, e aveese ai se Faamasino o le Faamasinoga.

Lau Afioga i le Fofoga Fetalai, o le Lafo e faapea ó Ina ia faatula nei loa se Komiti Faapitoa a le Palemene, e silasila i le galuega a le Faamasinoga o Fanua ma Suafa, ma toe lipoti mai i le Fono Aoao i lana fonotaga o Oketopa i le tausaga nei. O mataupu e tatau ona silasila toto i ai:

1. Taiala ma taualumaga o le Faamasinoga o Fanua ma Suafa (*Rules and procedures of the Land and Titles Court*)
2. Tofiga ma le mataituina o Faamasino o le Faamasinoga o Fanua ma Suafa (*Appointments and scrutiny of the Land and Titles Court Judges performance*)

O le suesuega, ia aga i ni auala ma tuuina mai ni fautuaga, mo le atinae o le Faamasinoga o Fanua ma Suafa, i mataupu patino nei:

1. Taiala ma taualumaga manino e faagasolo ai mataupu i le Faamasinoga o Fanua ma Suafa, aemaise mo le faaitiitia o mataupu tolopo (*e faamaimau taimi i Itu faamasinoga, e faatele galuega i le Faamasinoga, ma faamaimau tupe i le Malo*);

27 IUNI 2016

Saunoaga Faa-Minisita ma le Lafo mo le Tofia o le Komiti Suesue

2. Taiala ma taualumaga manino e tofia faavaitaimi ai, ma mataituina faatinoga a Faamasino o le Faamasinoga o Fanua ma Suafa, ina ia i ai ni vasaga e toe talosaga ai ma faatalanoa pe o agavaa pea e tauave tiute faa-Faamasino o le Faamasinoga o Fanua ma Suafa.

O lenei suesuega, e auga i le saili fesoasoani mo tatou tagata, ae ia aua nei oia ai faavae o le galuega Faa-Faamasinoga, i avanoa tutusa mo tagata uma, le sailiga o le amiotonu ma le faia o faaiuga tonu.

O le Komiti ua fautuaina:

1. *Lopao Natanielu Mua – Taitaifono*
2. *Nafaitoa Talaimanu Ketu – Sui Taitaifono*
3. *Hon Lauofo Fonotoe Pierre Lauofo*
4. *Aliimalemanu Alofa Tuuau*
5. *Faaulusau Rosa Duffy-Stowers*
6. *Faumuina Pauli Wayne Fong*
7. *Ili Setefano Taateo Tafili*

Fesoasoani:

1. *Loia Sili*
2. *Komesina o Sulufaiga*
3. *Faahuuluga, Matagaluega o Faamasinoga*
4. *Failautusi o le Fono Aoaofaitulafono*

O le Lipoti a le Komiti e tataua ona faataatia i luma o le Laulau-a-fono ia Oketopa 2016, ona faasea atu ai lea mo se Tali a le Faamasinoga e tuuina atu i le Kapeneta i le faaiuga o Novema 2016, mo le tuuina mai ma talanoaina e le Maota i lana fonotaga o Tesema ile tausaga nei lava 2016. Ole vave ona tagofia ole mataupu, ole vave maua foi lea ole fesoasoani mo tatou tagata, ma taoto i lagatonu lenei mataupu.

Ou te iloa, e leai se isi o tatou e luga i se Faamasino o i ai nei, o le mafuaaga foi lena e latou te le tagofia ai a tatou mataupu ona o le tulaga lea o ia aua nei tuuaia se faaituau o le Faamasinoga, ina ia i ai pea le talitonuga o tagatanuu i le Faamasinoga, ma o loo faatino le amiotonu a le Faamasinoga, e tutusa ai tagata uma.

Peitai, e luga mafai ona o tatou aloese mai le tiute matautu o le Palemene, lea o loo faatino e Komiti Faa-Palemene i le iloiloaina o galuega a le Malo pei ona tuuina mai i Lipoti a Matagaluega ma Faalapotopotoga a le Malo. E tataua foi ona faatino le galuega matautu lea i le iloiloaina o galuega a le Faamasinoga.

Ua leva ona faatafao lenei mataupu, faatalitali poo ai a amata-mea, ona pei e matamumuli e fai, nofonono atu ai ma tatou, e leai se galuega alofa i tagata a le Palemene ua faia i ai. O le uiga o nei tala o afai ae tatou nofoaia e le avatua se fautuaga i le Faamasinoga, o lo tatou tuuaulafo foi lena ma malilie i mea luga fetauti o loo tulai mai i lea taimi ma lea taimi. Ae sili ai ona tatou soli le finagalo o le Atua o lo tatou iloa o le mea e tataua ona fai, ae le faia. Fai mai foi se tasi tagata o le pau le avanoa e saofaga ai mea leaga, o le nofonono o tagata lelei e le faia i ai se mea (*the only way for evil to triumph is for good men to do nothing*).

27 IUNI 2016

Saunoaga Faa-Minisita ma le Lafo mo le Tofia o le Komiti Suesue

O le mafuaaga foi lea e tatou te suia ai le Faavae, au e l o se Faavae na aumai e outou tuua ma o matou matua e teu i se pusa tioata, ma leoleo i tago i ai se isi. O le Faavae na aumai e taiala ai lo tatou atunuu ma tagatanuu, o lona uiga, e tatau ona fuafua lelei ia talafeagai lenei Faavae ma suiga o le soifua. E leai se mea sili atu ona leaga, i loo lo tatou puipui i se mea ua le fetau ma i tatou, peiseai o le olaga o loo agai i luma, ae limataitaiina tatou e ni taiala ua sola aso e fetau ai (expire), ua tofafa mai foi tiasa tuua sa fetuai lelei ai.

O le sa o Samoa e faamoemoe i le Atua, ma le tof poto e foaā mai i ona Taitai e fuafua lelei ai, e le gata ina ia aua nei lelea ma lafoaia, ae ia faaaoga le au ma le savili ma o tatou malosiaga e folau ai, ina ia taunuu manuia le malaga. O le uiga lea o le soifuaga fuafua lelei, a lava tapena le lotoifale, e mauaa ma faigata ona osofaia e se fili mai fafo.

Lau Afioga i le Fofoga Fetalai, o le Lafo lena, ma lona siāsiā ó e faataatiaese tatou Tulafono Tumau, e l talanoaina ai, ae faasee loa i le Komiti ua lauina atu, e vave ai foi ona faagasolo latou galuega ma tuuina atu i le Faamasinoga, ma o tatou talanoaina ai lea i le faaiuga o le tausaga nei, ia Tesema.

Ma loā faaaloalo

ISI FAASILASILAGA A LE FOFOGA FETALAI

FOFOGA FETALAI: O lo o i ai nai isi foi faasilasilaga e fia tuuina atu mo le silafia e le mamalu o sui usufono o le Palemene:

1. O Lipoti uma a Komiti Faapalemene i Lipoti Faaletausaga, e tatau ona faataatia i le Fono Aoao i le masina o Aokuso e tusa ai ma suiga fou i a tatou Tulafono Tumau. Faamolemole silasila i le Tulafono Tumau 166(2).
2. Lua, o Tulafono Tau Faaofi uma ia na tuuina atu i le Komiti Faapalemene i le aso, e tatau ona toe Lipoti mai ia Oketopa 2016 se i vagana ai le Tulafono Tau Faaofi o Teuteuga o le Tulafono o Tulaga o Tagatanuu 2016 e toe lipoti mai i le Fonotaga o Aokuso 2016.
3. Mo le silafia foi e le Palemene, ua maea ona tufatufaina atu nisi o meaalofa mo le mamalu o le Fono, o mitiafu mai le polokalame faalauiloa mo fanau aoga, e faapea foi i iputi mo a outou ti taumafa, faapea flash drive ua maea ona tuuina i ai Tulafono uma a Samoa seia oo mai i le aso 31 Tesema 2015.

O nai faasilasilaga na mo le silafia e lenei Palemene faapea foi le silafia e Komiti Faapalemene o a tatou Lipoti ma ona taimi e pei ona tuuina atu mo la outou iloilogaga ma le lipoti mai i le Fonotaga a le Palemene e pei ona taua ai masina e pei ona taua.

Ua tatou toai taunuu i le siui o le tatou galuega i lenei aso, e momoli atu le faamalo ma le faafetai...

Se i tulai mai le Minisita mo Pisinisi, Alamanuia ma Leipa.

27 IUNI 2016

FAASILASILAGA A LE MINISITA

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Faafetai mo le avanoa, o lea ua ou faalogologo atu ua tau faaiuiu o le tatou Fonotaga i lenei aso, o lea foi ua maua i le saunoaga a le Palemia o nei e maea ai le tatou Fonotaga o lenei masina. Ae ua ou tulai atu lau Afioga, tau lava ina avatu se faasilasilaga aloaia a au nei o le Minisita i le mamalu o le Palemene, ona o se faanoanoaga o lo o i ai au nei ma le Matagaluega o Pisinisi, Alamanuia ma Leipa i le faafuaseia lea ona tau mai ua tuua le Malo po ua amia e le Atua se tasi foi sa galue i le tatou Malo, ua tele foi lona sao i le tatou atunuu. Ma e amia e le Atua le Afioga ia Peseta Margaret Malua o lo o avea pea ma Ofisa Sili o le Matagaluega. O le mea lea lau Afioga e avea ai lenei itula e molimoli atu ai le faamaisega a au nei o le Minisita, ou te talitonu e faapea foi le tatou Malo foi, i le nofoa alo, uso ma tuagane, aemaise foi o le mamalu o le aiga e faasaga i le Afioga ia Peseta. Tau ina alofa le Atua ma faamafanafana i o latou loto mafatia talu ai o le aveesea faafuasei o Peseta ona o le valaau paia a le Atua. Aua e pei ona maitau, sa taitai e Peseta le latou savali a le matou Matagaluega i le aso o le Fuø a o lea ua tolu vaiaso ae amia e le Atua. E i ai lava le naunautaiga ia maua pea le faamafanafanaga a le Atua i le aiga, faapea foi si aø Matagaluega, ia tatou mulimuli i galuega lelei sa fai sa faataatia mai e le sa taitaia le tatou Matagaluega ona soifua pea lea o ia i totonu o i tatou. Fai mai foi le Tusi, ðAmuia le auauna e asiasi mai lona Alii, a o lo o faapea lava ona fai.ö

O le faaaliga lea ma le faaaloalo lava i lau Afioga i le Fofoga Fetalai. Faafetai tele mo lou avanoa.

TOLOPOINA

FOFOGA FETALAI: Malo faafetai. Ua faafofoga le Palemene e tusa ai o le saunoaga a le Afioga i le Minisita mo Pisinisi, Alamanuia ma Leipa e tusa ai o le tuua ai e le Malo e se tasi o auauna sa tulai mai ma ave i ai le faatuatua e le Malo mo lana auaunaga i le Matagaluega. Ia, o le finagalo o le Malo i le aiga ae tainane foi Samoa e le o lea, ae o le soifua lava latou e puleesea e le tatou Matai i le lagi, e fai le moto, e oto foi le moemoe. Ia, a o faafofoga mai le paia o le aiga alii ma aiga e fia o le Afioga Peseta Margaret Malua, tatou te taufai lagona faatasi le faanoanoa ona o le valaau a le Atua. Ia tau ia ina ia faamaise le agaga o le Alii i le aiga ma le nofo a alo aemaise le afioaga o le Afioga ia Peseta, le Ekalesia ma le nuu ma aiga, e faapena foi ona faamaise le agaga o le Atua aua le Kapeneta ma le Palemene, aemaise o le faafofoga tapuai mai a Samoa. Ia talosia ia ia tafimala le alaafafaga ma le aiga, tatalo a le Palemene, ia pau se toa ae tu se toa aua le aiga ma le atunuu.

E momoli atu le faafetai ma le faamalo i le paia o le Palemene. Malo le usufono. E i ai le manatu e avea foi lenei avanoa taua matou te faamalulu atu ai i sui usufono mamalu, e le gata i lau Afioga i le Palemia ma le Sui Palemia ma le Kapeneta, aemaise o sui usufono filifilia o le Palemene, ae tainane foi o le faafofoga tapuai mai a Ofisa Sili o Pulega.

27 IUNI 2016

Tolopoina

Ia tofomalie pe afai ua i ai se faamatalaga ua faapena ona paopapa i le tatou nonofo ai ma le taumafaiga o le tatou Fonotaga. E poto lava le tautai ae sese lana atu i ama. Ia tatou maua le agaga o le fefaamagaloi. O le mea sili ona taua ua auomanu le tatou Fonotaga, o lea ua tatou toai i siui ona o le Atua ma Lona agalelei, ia foi le viiga i le Atua ae faapea foi ona tumau le faatauvaa ia i tatou. Ia faamanuia le Atua i le tapuaiga a Samoa e amata mai ona ao seia oo i ona iu, aemaise o le tapuaiga a le aufai tatalo.

Ae tatou te le i tolopo, ou te tapa le sui usufono mamalu mo Faasaleleaga Nu.4 na te faaiuina le tatou Fonotaga i se tatalo.

Na tolopo Taulumaga a le Fono Aoao i le itula e 1:28 i le aoauli seia aulia le itula e 9:00 i le taeao o le Aso Lua, 23 Aokuso 2016 e tusa ai ma le Polokalame o Fonotaga a le Palemene 2016/2017.